


Ntina Motoba Ya Boyei Ya Gabriele Epai Na Danyelee

 Kasi nakamwaki mingi na . . . bilenge na biso na ntongo oyo, bana mike, boyebi, mwa “ba-fefe” ná “ba-fifi,” bana mike, boyebi, ya mibu zomi na motoba. Mpe bakotaka na losambo, boyebi, pene na . . . Bana mike ya basi, pene na mibu wana, balingaka komonana kitoko, boyebi. Nsuki na bango, boyebi, élingámá-língámá likoló ya moto; Namonaki bango, wana nazalaki koteya, ezalaki ntango nyonso kokita, kokita. Mpe, nsima na mwa ntango, bakómaki kofúla yango élongwa na elongi, nsuki yango efungwamaki nyonso.

² Mwa mwana-mwasi ya Ndeko mwasi Downing, mpe—mpe namonaki ye. Mpe mwa—mwa—mwa . . . mwana ya Ndeko Collins . . . Nkombo na ye nani? Mwa . . . [Moto moko alobi: “Betty.”—Mok.] Betty, Betty moke. Nazalaki koseka mwa moke, ngai moko. Kasi namonaki bango nyonso, kitoko, boyebi, bamibongisi malamú, na bongo mbala moko ezalaki . . .

³ Malamú, mitema na bino épambolama, balingami, bozali kitoko, mpo na ngai, ata bongo. Ya solo. *Kitoko*, ezali, ezali molimo ya kitoko, oyo elingaka koya kofanda na mayangani ya boye, mpe koyoka Nsango-malamú. Yango nde esalaka kitoko ya elengé mwasi. Mpe nakanisi ete mwana mbali nyonso ya solosolo, oyo abongi mpo na libala, akanisaka ndenge moko. [Ndeko Neville alobi: “Amen.”—Mok.] Matondi, misié. Ezali malamú. Moto moko andimi ngai. Yango, yango ezali ya solo. Malamú. nandimaka ete yango ezali Bosolo.

⁴ Sikawa, ezali likambo ya kokamwa, boye te? Nafungoli mbala moko na Danyelee 9, ntango nafungoli Biblia na ngai. Sikawa, na momesano, nayebisaka bato nyonso ete bálóngola kazaka na bango te, baoyo bazali na simísi ya kotoboka, boye, nabanzi ete oyo ya ngai etobóká te. Kasi—kasi esilá kokóma ntango oyo nakokaki kolongola yango te, mpo ezalaki na lidusú moko na simísi yango, ya solo mpenza. Kasi nabanzi ete oyo ezali na yango te.

⁵ Sikawa, oh, mpo na ngai moko, biso . . . nandimi ete ezali mpe bongo mpo na losambo, ete tosepelaki na Bozali ya Molimo Mosanto na ntongo oyo.

Mpe tosepelaka na boyokani na bondeko mpe bozali ya bamoko ná bamosusu. “Ezalaka mpenza elengi, ezalaka mpenza malamú, ezalaka mpenza esengo, mpo na bandeko kofanda elongo kati na bomoko. Ezali lokola mafuta ya motuya ya

epakweli oyo ekitaka na mandefu ya Alóna, kino na nsuka ya elamba na ye.”

⁶ Nakendeki kuna kolia lelo, kuna na Blue Boar, mpe nani oyo nakutanaki na ye kuna bobele Ndeko Bill oyo awa, ná Ndeko mwasi Dauch oyo afandi kuna, bazalaki kaka—kaka kolia sósó ya kitoko koleka, ya kokálingá oyo natikálá komóná, bazalaki mpenza kolekisa ntango kitoko mingi, kobimisa motoki mpenza, boyebi. Namataki na eteni ya likoló mpe nakutanaki na lisanga monene ya bandeko ya losambo kuna, balingaki kutu kofuta mpo na bilei na ngai. Sikawa, ezalaki mpenza malamú, nasepeli na yango.

⁷ Ntango nakómaki na ndako, Billy ayaki ná kitúnga moko ya tomate, oyo moto moko amemelaki ngai, auti na yango mosika longwa na etúka kitoko mpe ya mpio, ya Georgia kuna, esika mpio ezali kuna, bayebisi ngai, pene na eleko oyo.

⁸ Bongo, nakutanaki ná elenge mobali moko na libanda. Nautaki kosilisa masolo na bato, nsima ya nzanga oyo, mpe nalekelaki awa na losambo, eleki pene na ngonga moko na ndambo, mpe mwa...elenge mobali moko, na libanda, alobaki...Nalobaki: “Molunge ezali.”

Alobaki: “Ezali mpenza *bongo!*” Nayebaki ete autaki na Georgia, bongo alobaki: “Ya solo, molungé ezali makasi na Georgia!”

⁹ Malamú, tozomeka kokima esika ya molungé koleka oyo, boye te? Yango nde ntina oyo toyeyi awa.

¹⁰ Natondi bino mingi, baninga, mpo na bolamu na bino nyonso. Nalingaki kosala nini soko bozalaki te? Nalingaki mpenza kosala nini—nini soko bozalaki te? Soki nazalaki na moto moko te oyo alingaki ngai, moto moko te oyo alingaki koyoka Nsango yango, Nsango na ngai nyonso elingaki kozala malamú na eloko moko te. Nakoki koteya Yango na makonzi ya telefone ná ba-nzete te. Balingaki kososola yango te. Boye, esengeli kozala na bato lokola bino nyonso, nde bokoya koyoka yango. Mpe ntango boyaka kofanda na esika ya molungé boye, mpe ezali...Mwasi na ngai alobaki ete alingaki kozika mobimba kuna, na ntongo ya lelo. Mpe komona bato, mpe mbala mosusu babéli, oyo bafandaka na mayangani ya ndenge wana, tika ete Nzambe ápesa bino nda—ndako ya kitoko mingi na Nkembo, nde libondeli na ngai. Mpe nazali kolikia mpe kotia motema ete Akosala yango.

¹¹ Sikawa, tótala. Kazaka na ngai, moto moko atiaki yango awa. Mpe nasengeli kotánga mwa mingi na mpokwa oyo. Bato boni bozali kosepela na biteni ya liboso ya likambo oyo? [Losambo balobi: “Amen.”—Mok.] Oh, soki molungé ezalaki makasi te, tolingaki kaka kokoba kokende, kolekisa mpóso mobimba, ná—ná Buku ya Emoniseli. Nalingaka Yango mingi. Nazozala kati na Yango mingi. Bóbondela mpo na ngai, mwa,

na mpóso oyo, mpo mokolo ya Lomingo ekoya na . . . Soko Nkolo alingi, nasengeli kokóma wana, kotia ba-mpóso yango esika moko. Kasi ezali eloko moko oyo nayebi eloko moko te na ntina na yango. Na boye nakotia kaka motema na Nkolo, ete Akopesa ngai eyano.

¹² Na—natángá bato ndenge na ndenge ebele oyo—oyo balobá na ntina na yango, oyo bakomá na ntina na yango. Natángá maloba oyo ekomami na nsé awa, na Dr. Scofield, moto ya mayele mingi, kasi, ya solo, nakokaki kondimana ná ye te, na makambo mingi oyo ye akomi na nsé, mpo nazokoka komona yango bongo te. Wapi. . . Esengeli—esengeli kopesa elílingí elongobani.

¹³ Sikawa, soki ozalaki kosangisa, ndakisa, biteni ya puzzle, mpe eloko ya liboso, olokoba: “Oh, oyo emati *awa*. Te, nandimi mpenza ete oyo nde emati *awa*.” Ee, osengeli kotala awa, na emekiseli na yo, mpo na komona eloko oyo ozosala. Bongo, soki o—soki osali bongo te, likambo na yo ekozala mobulu-mobulu.

¹⁴ Sikawa, bongo soki ozuaki. . . ozalaki na elilingi moko ya mboka moko ya kitoko mingi, mpe ngombe moko azali kolia matiti likolo ya nzete? Sikawa, wana elingaki kozala malamau te (boye te?), mpo aliaka matiti likoló ya nzete te. Boye, ezalaka nde bongo soki, yo, soki Molimo Mosanto atii Likomi yango esika moko te. Na ntango wana, ozali na elilingi monene, mobimba ya lisíko. Yango nde eloko oyo tolingaka, Solo. Mpe kino tóyeba Solo, tokotika likambo yango kimia. Na bongo, ntango Nzambe akopesa biso Solo yango, ee, na bongo, nakolobela yango.

¹⁵ Boyebi nini? Nabanzi Ndeko Roy Slaughter na—na bato mosusu ya kala, awa, baoyo babandáká kala eleki ntango molai. . . Ezalaki pene na, nabanzi, na mibu misato to minei oyo ya liboso ya lotomo na ngai, mpenza awa na tabernacle, nalingaki ata koteya na ntina na likambo ya lifelo te, mpamba te na—nazalaki kokoka komonisa te soki ezalaki esika ya kozika móto, to soki ezalaki nkunda. Mpe mbala nyonso oyo Liloba ezalaki koloba *nkunda*, nazalaki kozua ndimbola oyo elobi “*Hades*.” *Hades* ezali “nkunda.” Mbala nyonso oyo Elobelaki lifelo: “*Hades*, nkunda.” Mpe nazalaki kotika yango pembeni, kino ntango namonaki mpenza nini oyo nazalaki kolobela, na bongo, nateyaki likoló na lifelo, boye ntango namonaki mpenza elílingí mobimba yango mpe namonaki esika nini yango ezalaki. Mpamba te, nabanzi ete motei azalaka na mokumba liboso na Nzambe, na makambo oyo alobaka na losambo wana, mpo bango bakokangama na makambo yango mpenza. Na boye, bongo, ekozala ndenge nini soki nakangisi bango na esika oyo esengeli te, mpe bongo na ntango moko boye, ekanganeli yango esimbi na yango te? Bomoni?

Mpe na emononeli wana oyo Nkolo apesaki ngai, eleki mwa ntango, ntango ba-milió wana. . . ntango Ye oyo azalaki kosolola

na ngai, alobaki: “Okosambisama, liboso, na nzela na Nsango-malamu oyo oteyaka.”

¹⁶ Nalobaki: “Nateyaka likambo moko oyo Paulo ateyaki, ná baoyo mosusu na bango.”

¹⁷ Mpe ba-milió nyonso wana ya mingongo bagángaki: “Tozali kopema likoló na yango.” Likambo esilaki. Bomoni? Ya solo.

¹⁸ Boye, nalingi kokóba na mpokwa oyo, sikoyo, mpo tóumela mingi te. Mpe bóbosana te sikawa. . . Sikawa, na ntongo ya lelo. . . Nazali na mwa nkomá awa. Na ntongo ya lelo, nalobelaki Danyelee na boómbo, Gabriele ayaki epai na ye mpe apesaki ye malako ya mikolo mikoya. Yango nde toyekolaki na ntongo ya lelo, malako ya mikolo mikoya.

¹⁹ Sikawa, na mpokwa oyo, tozolobela *Ntina Motoba Ya Boyei Ya Gabriele Epai Na Danyelee*. Mokolo ya Lomingo ekoya, soki Nkolo alingi, tokotia mpóso ntuku nsambo na esika na yango, epai yango esengeli, na kati ya ntango. Mpe esika nini biso totelemi? Sikawa, soki tokoki bobele komona yango mpe kondimisa yango mpenza, na bongo tokoyeba mpenza ngonga oyo tozali kobika kati na yango. Sikawa, tokoyeba te ntango nini Ye azali koya; moto moko te akoyeba yango. Yesu, Ye moko, ayebi yango te. Alobaki ete Ayebaki yango te. Alobaki bobele Tata nde ayebaki yango. Ata Banje bayebi yango te. Moto moko te kati na biso ayebi ntango Ye azali koya, kasi tokoki koyeba ngo—ngonga oyo. . . ntango nini tozobika na yango, koyeba ete tokómi mpenza pene na yango.

²⁰ Sikawa, mpo na kolandisa yango mwa moke, lokola bandeko bazali kotia yango na bande. . . Ba-masíni ezali kosala mosala kuna na eteni ya ndako. Mpe ba-bande yango, ya solo, etíndamaka, bipai nyoso.

²¹ Sikawa, liteya ya ntongo ya lelo, nsima na kozongela mikapo ya 4 mpe ya 5, na nsima tozuaki. . . kobanda na mokapo ya 9 ya Danyelee. Sikawa, na mpokwa oyo, tozokóba na mokapo ya 9. Liboso tóbelema na yango, tógúmba mitó mwa moke mpo na kosolola na Mokomi ya Liloba.

²² Nzambe na biso na ngolu, tondimisami ete Oyebi mpenza mposa ya mitema na biso. Oyebi mpo na nini tozali awa. Mpe Oyebi ete toyei ata moke te na mpokwa oyo kaka mpo tokanisaki ete ekozala esika malamumu ya koya, mpo na kopema mwa moke na nsima ya nzángá. Tata, nandimi te ete moto moko azali awa na ntina wana. Nandimi ete tozali awa na mpokwa oyo mpo tozali mpenza sembo, na bosembo nyonso, mpe na mposa ya koyeba **YANGO ELOBI NKOLO**.

²³ Tolingi Yo, Nkolo, mpe tolingi Liloba na Yo. Mpe soko esika oyo Osili kopesa biso, mwa motóndo likoló na motó na biso, ná ba-bríki oyo ya beton, tozongisi matondi epai na Yo mpo na esika yango. Mpamba te, tondimi ete Ndako moko ezali koleka likoló, kuna epai wapi tozali kokende. Mpe tozokanisa bankóko na biso,

oyo bazalaki ata na litomba oyo te, yango esálaka ete tógumba mitema na biso na nsóni, Nkolo, soko tolingi komilela.

²⁴ Sikawa, Tata, tobondeli ete Ófungolela biso Makomi, na mpokwa oyo. Yaka kotambola elongo na moko na moko na biso, wana tozali kolanda nzela oyo na mpokwa oyo. Solólá na biso ndenge Osololaki na baoyo bazalaki kokende na Emau, uta na Yelusaleme. Na lolenge ete, ntango losambo ekosila, na mpokwa oyo, tókoka kozonga na moko na moko ya bandako na biso mpe koloba: “Mitema na biso ezalaki kopela te na kati na biso, wana tozalaki koyoka Ye koloba na nzela ya Liloba na Ye!”

²⁵ Pambola litángi. Pambola mwa makasi na ngai, Nkolo. Fungola monoko na ngai na oyo ezali solo, mpe kanga yango na oyo ezali lokuta. Zua nkembo mpo na Yo moko, mpe nkembo kati na bato na Yo, mpo bákoka komona ngonga oyo tozali kobika na yango mpe Boyei ya Nkolo Yesu oyo ebelemi. Mpamba te, tosengi yango na Nkombo na Ye—na Ye, Nkombo na Yesu Klisto. Amen.

²⁶ Sikawa, mpo na kozóngela Makomi na biso mwa moke, tomonaki ete Danyele asilaki koumela na boómbo mibu ntuku motoba na mwambe. Bókanisa naino! Sikawa, bino baoyo bozali na nkasa mpe ekomeli, baoyo bakomaki yango te na ntongo oyo, bokoki kokoma yango na mpokwa oyo. Kobandá mobu 606 liboso na Y.K. kino mobu 538. Bólongola 538 na 606, bokozua mibu ntuku motoba na mwambe oyo Danyele azalaki na . . . moómbo; lingomba ya kokende te, mateya ya koyoka te, eloko moko te. Kasi azalaki na mwa babúku, mwa mikanda, oyo mosakoli moko liboso na ye asakóláká, mpe ezalaki—ezalaki Yilimia.

²⁷ Sikawa, wana azalaki koyekola Makomi, amonaki ete ntango ekomaki kosila, ete ntango ya mibu ntuku nsambo. . . Danyele azalaki mpenza kondima maloba nyonso oyo mosakoli Yilimia alobáká. Mpe nalobi likambo oyo, na kelasi na ngai na mpokwa oyo: Tosengeli nde kondima basakoli na biso? [Losambo balobi: “Amen.”—Mok.] Iyo, misié. Mpamba te, Liloba na Nkolo eyaki epai na basakoli. Bazalaka na YANGO ELOBI NKOLO. Mpe mosakoli ya solo akokesana ata moke te ná—ná liloba ya mosakoli mosusu. Bakolobisa na Yango ata moke te eloko oyo Yango elobi te. Bakoloba bobele mpenza oyo mosakoli ya solo alobaki, yango nde esalaka ete bázala basakoli. Na nsima, ntango basosoli yango, na bongo, balobaka liboso likambo nini ekosalema, na koyebaká likambo oyo, ná bobángi na mitema na bango, ete bálوبا eloko moko te ya lokuta oyo ekobungisa moto nzela. Tolingaka kosala bongo ata moke te. Tolingaka kondimisama mpenza ete tozali na Liloba na Nkolo liboso ete tóloba YANGO ELOBI NKOLO. Bomoni? Esengeli kozala etemelo, nsango oyo euti mbala moko na Ngbende ya Nzambe, to, tosengeli koloba yango ata moke te.

²⁸ Sikawa, wana azalaki koyekola Makomi, amonaki ete mibu ntuku nsambo ekómaki pene na kosila. Boye, ezalaki ye kuna

mibu ntuku motoba na mwambe, etikalaki mibu mibale, liboso Nzambe ázongisa libota na Ye na mabelé na bango.

Wana azalaki na mabondeli, tomonaki ete Mwanje moko ya nguya ayaki uta na Likoló. Moto moko akoki koloba nkombo na Ye? [Losambo balobi: “Gabriele.”—Mok.] Gabriele. Mpe Azalaka Mwanje epai na lingomba ya Bayuda. Bato boni bayebi yango? Na bisika nyonso, ezalaka Gabriele. Gabriele azali motindami na lingomba, lingomba ya Bayuda; ayaki epai ya Malia; Ayaki epai ya Zekalia. Ntango nyonso, ezalaka Gabriele. Mpe Azali moko na Baanje minene ya Lola. Mpe Amemelaki Ndeko na biso Danyelee mbote ya malamumu mingi kouta na Nzambe! “Oh, Danyelee, ozali mpenza molingami!”

²⁹ Olingaki komiyoka mpenza malamumu te, kokanisa ete Nzambe alingá yo? Soki nalingamaki mpenza te, nalingaki kaka kosepela koyeba ete nalingami mwa moke kuna na Likoló, boye te? Solo mpenza. Mwa moke . . . ete Akanisaka ngai, na ntango na ntango, elingaki kopesa ngai mpenza mposa ya kogánga, kokanisa ete Atalaka kutu makambo na ngai. Mpe tozali na endimiseli mpenza ete Atálaka makambo na biso, mpo: “Wana tozalaki naino basumuki, Klisto akufaki na esika na biso,” ndeko. Mpe, sikawa, wana ezalaki biso bapaya mosika na Nzambe, sikawa abelemisi biso pene na Nzambe, mpe apesi biso ndangá ya lobiko na biso, oyo ezali, Molimo Mosanto. Mpe ná kondima kuna na kati oyo etómbolaka biso likoló na makambo ya mokili, mpe tolekaka likoló na yango. Ezali nkembo. Boye te? Malamumu.

³⁰ Wana azalaki kati na mabondeli, Gabriele ayaki koyebisa ye kaka te ete etikalaki lisusu mibu mibale liboso bázonga na mabelé na bango, kasi ayebisaki ye makambo nyonso oyo ekosalema kino nsuka ya ekólo yango. Bókanisa naino! Nsuka mobimba, mobembo moko na moko, Gabriele alimbolaki yango na Danyelee. Alobaki ete Atindamaki mpo na koyebisa Danyelee likambo monene oyo. Mosakoli yango asengelaki komiyoka mpenza ndenge! Mpe Ayebisaki ye ete mpóso ntuku nsambo ekatamaki mpo na libota yango, kino na kobebisama; oyo wana ezali ntango ya nsuka, boye, nyonso esili, kobebisama. Alobaki: “Mpóso ezali ntuku nsambo.”

³¹ Bamosusu batiaka yango na ba-sanza, bamosusu na mikolo, bamosusu . . . Huh! Soki ezali na yango bobele bampóso, epesi kaka pene na mibu mibale ná moko ya minei, to mobu moko ná moko ya minei na yango. Mpe, bomoni, bino . . . Wana nde epai tosengele koluka koyeba, mpo na kozala na bosolo mobimba.

³² “Mpóso ntuku nsambo ekatami mpo na libota na yo.” Na ntina nini? Mpo na nini? Ekátamaki mpo na libota ya nani? Libota ya Danyelee, Bayuda. Mpe ekátamaki na ntina nini? Kaka mpo na Danyelee te, kasi mpo na engumba mosantu ya Danyelee; bomoni, engumba mosantu ya Danyelee. Sikawa, kelasi,

engumba mosantu ya Danyelee ezalaki nini? [Losambo balobi: “Yelusaleme.”—Mok.] Yelusaleme.

³³ Sikawa, tokozua, ntango mosusu tokomona yango na mpokwa oyo: Yelusaleme ezalaki wapi? Nani abandisaki Yelusaleme? Botikálá kokanisa yango? Nani abandisaki Yelusaleme? Ebandisamaki ntango nini? Tokokóma na likambo yango, nsima na mwa ngonga. Nani abandisaki Yelusaleme? Tala, ezali mwa eloko moko ya moke ebómbámá na litumu, kasi Elobi yango mpenza. Iyo, misié. Nani abandisaki Yelusaleme, mpe ebandisamaki ntango nini? Malamu. Mpe wana nde engumba mosantu ya Danyelee.

³⁴ Mpe tososoli mpenza ete engumba yango, oyo elakélámáki mabe eleki sikoyo mibu nkóto mibale, ekotongama lisusu mpe ekozongisama lisusu. Mpe losambo na tempelo ekozonga, kaka ndenge ezalaki na ebandeli. Ya solo. Yelusaleme ekotongama, sikawa, mpe mbeka ekozala, mbeka ya mokolo na mokolo ekopesama lisusu, kaka ndenge ezalaki na ebandeli. Tokokota na mingi na makambo yango, nabanzi, na mpokwa oyo, to mingi na yango.

³⁵ Sikawa, nalingi bino bóyeba, baninga, ete, ntango nazali kolobela makambo oyo, nazali mpenza kotia pembeni ba-mpóso ya malakisi. Kazi nazali kolobela yango kaka likoló-likoló, mpo ntango molunge ekobanda kosila, to mwa moke nsima na yango, ntango tokokóma na Bilembo Nsambo wana, Mbeki Nsambo, Kelelo Nsambo, makambo nyonso oyo, mpo nákokoka kozongela yango mpe koloba: “Bózali koyeba lisusu mpóso ntuku nsambo ya Danyelee? Bozali koyeba lisusu eleko ya Lingomba, ntango emataki, mpe eloko nini esalemaki?” Mpe mpóso ntuku nsambo ya Danyelee oyo ezali longwa na bokei Lingomba kino bozóngi ya Lingomba. Ntaka wana nde yango ezali kolobela. Sikawa, sikawa, ezali mpóso ntuku nsambo ya Danyelee nyonso te; eteni na yango nde. “Mpóso ntuku nsambo ekátamaki.”

³⁶ Sikawa, ntina ya boyei na Ye ezalaki motoba, koyebisa ye eloko nini ekokóma. Sikawa, boyei na Ye ezalaki na ntina motoba. Sikawa, na mpokwa oyo, nakanisi ete tokozongela awa na Makomi, epai tozalaki na ntongo, epai wapi ezalaki kolobela na ntina motoba. Yango oyo. Sikawa, tomonaki ete ntina ezalaki motoba, moko na yango. Sikawa tózua mokapo ya . . . -na minei, molongo ya . . . -na minei . . . molongo ya 24 ya mokapo ya 9 ya Danyelee.

Mpe mpóso ntuku nsambo ekatami mpo na libota na yo . . .

Sikawa bómikanisela, yango nde ntango ya mobembo mobimba oyo bana ya Yisraele bakosala na mokili oyo. Esíli kokatama. Mpóso ntuku nsambo esíli kokatama. Yango nde nyonso oyo epésámi na Bayuda.

. . . mpo na libota na yo mpe mpo na engumba mosantu na yo, . . .

Yango wana, mpóso ntuku nsambo oyo, sikawa, bózanga yango te, ekomonisa makambo kobanda na ntango wana kino na nsuka ya Bayuda, mpe kino na nsuka ya Yelusalema, kino ntango engumba ya sika ekotongama. Sikawa, oh, nabanzi ete tokoyekola yango, malamú mpenza mpe na bozindo na mpokwa oyo.

. . . ekatami mpo na libota na yo mpe mpo na engumba mosantu na yo, . . . (Mpo na nini?) . . . mpo na kosukisa mabe, . . .

³⁷ Likambo nini Ayebisaki ye sikawa? Azalaki koluka koyeba ntango boni etikalaki. “Nayebi ete tokomi na ntango ya nsuka.” Ndenge biso tozali sikawa: “Nkolo. . .”

³⁸ Bato boni kati na lisanga oyo, na mpokwa oyo, bandimi ete tokómi na ntango ya nsuka? Bóloba: “Amen.” [Losambo balobi: “Amen.”—Mok.] Matondi. Tokómi na nsuka. Sikawa, tozali koluka koyeba, na lisungi ya Nzambe, etikali mpenza ntango boni. Tozali kobika na mokolo nini? Yango wana tozali kozongela mpe kozua makambo oyo basakoli yango balobaki, mpe bongo na bongo, mpe koluka koyeba epai wapi tokómi.

³⁹ Mpe yango nde Danyele asalaki. Abongolaki miso epai na Nzambe. Bato boni batángaki Danyele 9 lelo? Bótombola maboko. Malamú. Bomoni libondeli na ye, ndenge ayámbolaki mpo na libota na ye, ná ndenge ayámbolaki mpo na ye moko. Alingaki kondimisama ete ayebaki mpenza ntango oyo basengelaki kozonga, mpo alingaki koléngela bato mpo na kozonga.

Sikawa, oyo nazali koluka kosala, ezali koyeba mpenza ntango nini tokomata, mpe koléngela bato mpo na komata, baoyo bakomiléngela. Mpe tobaloli miso epai na Nzambe, na nzela na mabondeli mpe malómbo, mpo na koyeba: “Nkolo, ntango nini tozali kobika kati na yango?”

⁴⁰ Tosili komona makambo nyonso oyo ya ndenge na ndenge kosalema; tozali komona mokili kati na mobulu. Tozali komona ntango ekómi pene. Li-. . . likoma ezali na etutú, makambo nyonso oyo Nzambe alobaki. Toyoki tata Mokonzi na biso ya ekólo koloba na ntina na etumba mosusu, ezali koya sikawa. Tozali koyoka elakeli ete: “Nsima, oh, ngonga moke nsima na etumba, elakamaki ete bikólo bikotikala bobele mputulú ya volcan.” Mpe toyebi ete ezali bongo.

Boye toyebi, liboso yango ésalema, Lingomba esengeli kokende. Boye: “Nkolo, tokómi nde wapi?” Yango nde ntina ngai nandimaka ete Akoyebisa biso yango. Tosili kobalola miso na biso mpo na koyeba. Sikawa, ya liboso, tólíka koyeba.

Mpóso ntuku nsambo ekatami mpo na libota na yo...engumba mosantu na yo, mpo na kosukisa mabe, ...kosilisa lisumu, mpe kosala boyokani mpo na bokesene...mpo na kokotisa boyengebene ya lobiko na lobiko, ...mpo na kokanga emononeli mpe lisakoli na elembo, mpe kopakola esika eleki Bulee.

41 Yango nde ezalaki ntina motoba ya boyei ya Gabriele.

42 Sikawa tóbanda, motango ya liboso. Soki bolingi kokoma yango, bino baoyo bozali na bikomeli. Motango ya liboso, “Kosukisa mabe,” yango nde eloko ya liboso. Sikawa, mpo na kosukisa mabe ya Yisraele, oyo abukaki mibeko ya Nzambe, ekozala kolongola mabe ya Yakobo.

Sikawa, mpo na komona yango, tózua Baroma. Mokapo ya 11 ya Baroma, kobanda na molongo ya 21, ya Baroma 11. Sikawa tókósála nini? “Kosukisa mabe.” Baroma 11:21. Malamu.

Mpo soko Nzambe atikaki te etápe na yango mpenza, ... (Elingi koloba nani? Yisraele.) ... akotika...mpe yo te.

Sikoyo, nalingi ete bino, ntango bokozonga na ndako, bótánga mokapo mobimba oyo ya 11. Nakotánga kaka oyo mpo...Bókoma mokapo mobimba ya 11, mpe bótánga yango.

... akotika yo te.

Yango wana tala boboto...mpamelá ya Nzambe: epai ya baoyo bakwei, ...kasi epai na yo boboto, soko oumeli na kati ya boboto yango: soko te, yo mpe... okolongolama, yo okolongolama.

Bango mpe, soko baumeli te kati na kozanga-...soko baumeli te kati na kozanga kondima, bakobákama: mpo Nzambe azali na makoki ya kobáka bango lisusu.

Bomoni, koloba ete ntango moko ekoya, oyo Mabota ekolongolama, mpe Yisraele ekozonga kati lisusu.

Mpo soko yo osilaki kolongolama na—na nzete ya eláya oyo ezalaki ya zamba (Mabota), mpe opikami na nzete kokesene na bokeli...

Tozalaki na bokeli ekeseni, bapaya, zángá mawa, zángá Nzambe, ná elikia ata moke te. Mpe Nzambe, na mawa na Ye, mpo na kopesa biso libaku malamumu, alongolaki moyengebene Yisraele mpo na mabe na bango, mpe atiaki bango pembeni, eláya ya zam-...oyo elónamaki, mpe akotisaki eláya ya zámhá, oyo ekeseneki na lolenge na yango.

...na nzete...malamu: koleka boni bango, oyo bazali bitápe oyo bibimaki na nzete yango, bakopikama na eláya na bango?

Malamu, tókoba kotánga.

Mpo, nalingi te, bandeko, ete bózanga koyeba libombami yango, mpo bózala na mayele na makanisi na bino moko te; ete kúfa miso ekómelaki Yisraele, ekómeli Yisraele, kino motángo mobimba ya Mabota. . . ekokota.

⁴³ Kino ntango oyo Nzambe akosílisa ná Mabota, Yisraele abomamaki miso. Bakweaki na lisumu mpe na kobuka mibeko liboso na Nzambe mpamba te Nzambe abomáki miso na bango, mpo biso tópickama wana. Bosósoli yango? Molongo ya 26 sikawa:

Mpe bongo Yisraele mobimba bakobika: . . .

⁴⁴ Nzambe abomáki bango miso na nko mpo na yo ná ngai. Bakoki komona te, mpo Nzambe abomáki bango miso. Mpe Yisraele mobimba, Yisraele ya solo, bakobika. Mwanje alobaki nini? Nkembo! “Mpo na kosukisa mabe ya Yisraele! Nayeí koyebisa yo ete ntango ekoya wana mabe ya Yisraele ekosila.” Nzambe akolongola etápe wana ya zamba, mpe akobamba yango lisusu na kati wana, etápe wana ya solosolo.

⁴⁵ Oh, mbala mosusu esalaka motema na ngai mpasi, komona babóla ya bato wana ná mawa, baoyo balongolamaki kuna, kozanga koyeba esika bazalaki kokende; mpe kokanisa ete Nzambe, na mawa na Ye, asalaki bongo mpo ngai nákoka kobikisama. Abomaki bango miso bázanga komona Masiya na bango moko, Akangaki bango matoi mpo bákoka koyoka Ye te; nzokande, bazalaki kotala sémbá bikamwa na Ye, kotala sémbá bikamwa na Ye mpe nyonso oyo Azalaki kosala.

⁴⁶ Matai, nabanzi, mokapo ya 12, to ya 8 to mokapo ya 12, elobi: “Atako Yesu asalaki bikamwa mingi mpenza, kasi bakokaki kondima te.” Mpamba te, Nzambe alobaki: “Bazali na miso kasi bakoki komona te, ná matoi kasi bakoki koyoka te; soki te bakomóna na miso na bango mpe bakoyóka na matoi na bango, mpe nakobongola bango.” Kasi, mpo biso tókoka kozua libaku malamú, Akitisaki ezipelo na miso ya bana na Ye moko, Alongolaki bana na Ye moko na mésa, mpe Atángwisaki bango mosika na makambo ya Molimo, mpo Akoka komona. . . mpo tókoka kozua libaku malamú ya kozala na bomoi, kopesáká biso Bomoi. Molongo ya 26 lisusu.

Na bongo, Yisraele mobimba bakobika: pelamoko ekomámi ete, Mosikoli akouta na Siona, mpe Akolongola mabe ya Yakobo:

⁴⁷ Iyo, Akoya na Ngomba Siona, moko na mikolo oyo. Kuna na Ngomba ya Biláyá, bakoyeba Ye, mpe Yisraele mobimba bakoyeba ete ezali Ye. Mpo na Mabota, ntango ekosila, na ntango yango. Etápe oyo epikámaki, Nzambe akolongola na yango mbuma oyo esangisamaki. Mpe etápe oyo ya zamba eko. . .

⁴⁸ Sikawa bómikanisela, na ebandeli awa, wana botángí, Alobaki: “Soko misisa wana ezalaki búle, mpe misisa wana ezalaki Mosisa ya búle, mbuma mpe oyo euti na Mosisa ya búle

wana ekobota mpe mbuma ya búle.” Mpe soki Mosisá yango ezalaki Yesu Klisto, Oyo azali mbala moko Mosisa mpe Mokitani ya Dawidi; soko Bomoi oyo ezalaki kati na Ye, elekaki na nzela na libota ya Bayuda mpe elongolamaki na kati na bango, mpe miso na bango ebomamaki mpo biso tókoka komona, bomoi na biso esengeli kolongobana na Etape oyo epambólámá. Oh, iyo, ndeko. Ya solo.

⁴⁹ Nzambe alongolaki bango, na ntina, mpe abomaki bango miso, mpo biso tózua libaku ya komona, apesaki biso libaku malamu. Kasi tokómi kotambola lokola tozali bato minene. Paulo ayebisi bango awa: “Bókeba, na ndenge bokosala. Bókeba! Mpamba te, soki Nzambe atikaki étápe ya nzete ya mboka te, lolenge nini Akoyoka mawa koleka mpo na étápe ya nzete ya zámba oyo esili ko. . .”

Bongo, tókotambola-tambola, koloba: “Nazali Presibiterien! Nazali Metodiste! Nazali Batiste! Nazali Pantekotiste!” Yango elingi koloba eloko moko te epai na Nzambe. Osengeli kobotama mbala ya mibale na Molimo Mosanto oyo auti na Mosisá. Kasi Ayaki. . .

⁵⁰ Sikawa, bómikanisela, Azali kolobela bato ya Mabota te. Nazali kaka koloba yango awa mpo bómona esika oyo bato ya Mabota bazui libaku na bango.

⁵¹ Kasi Ayaki nde “mpo na kosukisa mabe,” mpo na kosukisa yango. Sikawa, soki tozongi na Danyelee lisusu, tokomona ete na Danyelee, tokomona yango awa, na molongo ya 24. Malamu. “Mpo na kosukisa mabe.” Mpo na kosukisa nini? Mpo na kosukisa mabe ya Yisraele.

Mabe elakisi nini? Elakisi kosala eloko oyo esengeli te. Mabe epai na ngai, elakisi kosalela ngai mabe. Mabe epai na yo, elakisi kosalela yo mabe.

Boye, Yisraele asalelaki Nzambe mabe. Mpe na mpóso oyo ya ntuku nsambo, eloko nini ekosalema? Nzambe akosukisa mabe ya Yisraele. “Kosukisa mabe,” ekozala “kolongola mabe ya Yakobo.” Na bongo, Yisraele mobimba akobótama mbala ya mibale. Bango nyonso bakozua Molimo Mosanto.

Sikawa, motango ya mibale, bókoma yango na nkása na bino.

⁵² Tokokaki kouwela ntango molai na likambo oyo wana, kasi nalingi kobanda koteya likolo na yango te. Nalingi kaka kosolola na bino, mpo bókoka kosósola yango malamu mpenza. Ntango tokoyékola Bilembo Nsambo oyo, bongo nde bokokoba malamu mpenza kati na Lingomba, kati na Bilembo, kati ya Malozi, mpe bokoyeba esika nini totélémi. Malamu.

⁵³ Motango ya mibale: “Kosilisa masumu.” Sikawa tótánga lisusu, Danyelee.

...mpo na kosukisa...mabe, mpe—mpe kosilisa masumu,...

Yango nde ntina ya mibale ya boyei na Ye. Ya liboso, ezali mpo na kosukisa mabe ya Yisraele; mpe kosilisa masumu. Yisraele basalaki lisumu esika nini? Esika nini basalaki lisumu na bango ya mabe koleka? Bamikabolaki ná Nzambe epai wapi?

⁵⁴ Sikawa bóyoka malamumu. Tózua Santu Matai 24. Awa nde esika Yisraele asalaki libunga na ye ya mabe koleka. Awa nde esika asalaki lisumu na ye ya nsuka, mpe ntina oyo azali na lolenge yango lelo. Matai, mokapo ya 27 ya Nsango—malamumu ya Santu Matai, molongo ya 25 ya mokapo ya 27. Tóbanda nzinganzinga ya molongo ya—ya 21.

Moyangeli ayanolaki mpe alobaki na bango: Nani kati na bango mibale bolingi ete nátikela bino? Mpe balobaki: Balaba.

Sikawa bómikanisela, oyo wana ezali Yisraele. “Balaba!”

Pilate alobaki na bango: Násala nini...na Yesu oyo babengi Klisto? (Bóyoka bango!) Bango nyonso balobaki na ye: Ábákama na ekulusu.

Bómikanisela, oyo wana nde Masiya na bango oyo Danyele alobáká ete akoya. Bomikanisela na ntongo ya lelo, na liteya awa: “Akolongolama, mpo na Ye moko te,” Asalaki eloko moko te.

...Ábákama na ekulusu.

Mpe moyangeli alobaki: Ee, asali mabe nini? Kasi bagángaki lisusu makasi, balobaki, Ábákama na ekulusu.

Bongo Pilata, lokola amonaki ete akozua mbano moko te, kasi...yikiyiki ezalaki komata, mpe akamati mai, mpe asukolaki maboko liboso na ebele na bato, alobaki: Makila ya moyengebene oyo ezali likolo na ngai te: botala...yango.

⁵⁵ Bóyoka! Libunga na bango yango oyo. Lisumu na bango yango oyo.

Bongo bato...bayanolaki, mpe balobaki: makila na Ye ézala likolo na biso, mpe likolo ya bana na biso.

⁵⁶ Na esika wana nde basalaki yango. Azalaki kosilisa lisumu mpo na bango. Ndenge nini Akokaki kosala likambo mosusu soki kolimbisa bango te, koyeba ete Asengelaki koboma miso na bango, mpo biso tókota? Ezali lokola bana na Ye moko bazali kosenga Makila na Ye. Babomamaki miso, mpe Ayebaki ete babomamaki miso. Yango wana Alelaki mpo na koséngela bango bolimbisi. “Limbisa bango, Tata, mpo bayebi te oyo bazali kosala.” Bazalaki bakúfi miso. Mpo na biso, bango babomamaki miso. Na kozanga kondima na bango nde basalaki likambo oyo. Kasi ntango bakomona Ye lisusu...Amen!

57 “Kosukisa lisumu.” Lisumu ezali nini? Kozanga kondima. Bandimaki te ete ezalaki Masiya. Bakokaki komona te ete Azalaki Masiya, ata Asalaki bilembo nyonso oyo Masiya asengelaki kosala. Kasi bakokaki komona yango te. Bazalaki bakúfi miso.

58 Boye, ntango bomoni bato koloba: “Nandimaka lobiko na nzoto uta na Nzambe te. Nakoki komona yango te. Nakoki komona libatisi ya Molimo Mosanto oyo te.” Bósilikela bango te; bazali bakúfi miso. Balobaka: “Nakoki komóna Nsango oyo ya Boyei na Ye te. Nakoki komona libatisi ya Molimo Mosanto te. Nakoki komona momboto na nyoka te. Nakoki komona makambo oyo te.” Bazali bakúfi miso, kasi bayebi yango te. Bóbondela kaka mpo na bango. Malamu.

59 Na kozanga kondima na bango; kasi, ntango bakomona Ye, ntango Akoya lisusu, ekosukisa kozanga kondima na bango. Oh, la la! Tózua naino Genese mokapo ya 25, ya 45, mpo tózua e—etaliseli na yango. Nakomaki likambo moko awa, na Genese 45, mpo na bino baoyo bozali kokoma. Oh, nalingaka Nsango—malamu ya kala oyo mingi! Malamu. Sikawa toyebi esika nini tokómi.

Bozali koyoka ngai malamu kuna na nsima ya ndako? Bótombola loboko soki bokoki koyoka ngai. Natiaki eloko oyo mwa pene mingi.

60 Sikawa tokotángá eteni ya Likomi yango. Nalingi ete bóyoka, bino baoyo bozali na Biblia na bino te. Bino baoyo bozali na Biblia na bino, ezali Genese. Ya liboso, tóbanda na mokapo ya 44, kobanda na molongo ya 27.

61 Ezali Yozefe, Yozefe azalaki etaliseli ebongi be ya Klisto. Toyebi yango. Bato boni bayebi yango? Ayinamaki na bandeko na ye. Mpo na nini? Mpo azalaki moto ya molimo, azalaki komona bimónoneli, kolimbola ba-ndótó. Azalaki moto ya molimo katikati na bandeko na ye, mpe bayinaki ye. Kasi tata na ye alingaki ye.

Pelamoko moko Yesu ayinamaki na mangomba ya badenomination, kasi alingamaki na Tata na Ye Nzambe. Mpo na nini bayinaki Ye? Mpo Azalaki moto ya molimo. Mpo... Balobaki, balobaki ete Azalaki moto na solóka, molimo mabe.

62 Boyebi lisusu likambo oyo bandeko na Yozefe balobaki na ye? “Molóti ndoto ye wana azali koya.” Bomoni? Bomoni, ndenge moko. Mpe batekaki Yozefe pene na ntalo moko oyo Yuda atekaki Yesu, palata ntuku misato. Babwakaki ye na libulu, mpe bakendeki koyebisa tata na bango ete eloko moko ebomaki ye, akufaki. Kasi abimisamaki na libulu. Klisto abwakamaki na libulu, mpe abimisamaki. Mpe kolongwa wana, amataki na esika ya likolo koleka nyonso oyo ezalaki na mokili. Amen! Yozefe akendeki na loboko ya mobali ya Fálo; Yesu mpe akendaki na loboko ya mobali ya Nzambe. Kati na komekama

na ye, liboso átombwama . . . Yesu, liboso Átombwama, alekaki na komekama.

⁶³ Boye, nandimi ete ezalaki Billy Sunday, mopalanganisi monene ya Nsango-malamu, alobaki: “Na nzete moko—moko na moko Banje milió bafandaki wana, mokolo wana ya kobakama na ekulusu, balobaki: ‘Bimisa kaka loboko na Yo mpe talisa yango epai na biso. Tokobongola likambo oyo awa.’” Kasi Akokaki kosala yango te.

⁶⁴ Kayafa alobaki: “Amibikisaki; akoki kobikisa bamosusu te.” Ayebaki te ete azalaki koloba malamau mpenza. Soki Ámibikisaka Ye moko, mbele Akokaki kobikisa bamosusu te. Boye, Amipesaki Ye moko, mpo na kobikisa bamosusu. Bomoni, bakufaki mpenza miso na likambo yango. Sikawa . . .

⁶⁵ Na bongo ntango azalaki kuna, na kotombwama na ye, to, liboso ya kotombwama na ye, komekama na ye . . . Bómikanisela, Yozefe abwakamaki na boloko mpo asalaki mabe moko te.

⁶⁶ Molóma, to mokonzi na mapinga ya Yisraele, nkombo na ye Potifala; Potifala akendeki, akendeki mobembo. Azalaki na mwasi moko kitoko, mpe mwasi na ye abengisaki Yozefe na ndako mpo ásala likambo moko, mpe alukaki kosalisa Yozefe likambo moko ya mabe. Kasi ye azalaki sembo epai na Nzambe. Nalobi na bino, ntango nyonso, ba . . .

⁶⁷ Bino basi, napámelaka bino; sikawa nakoloba mpo na bino, mwa moke. Bomoni? Mwasi azali mbeki ya bolembu mingi. Nayebi ete mobali ya mabe akoki kozala te soko mwasi ya mabe azali te. Kasi mobali oyo ayebi yango, mobali oyo oyebi ete ozali mwana na Nzambe, mpe omipesi mbano likolo ya mwasi, nsoni na yo; ata asali nini. Azali mbeki ya bolembu koleka, mpe oyebi yango. Soki abandí kotángwa, mpo na kosala makambo oyo elongobani na mwasi te, simba ye na loboko mpe solola na ye lokola ndeko mwasi. Ozali mwana-mobali ya Nzambe. Kosala makambo ya mabe wana te. Tala Yozefe, azalaki ndakisa mpo na yo.

⁶⁸ Me ntango mwasi ya Potifala, mwasi kitoko oyo, mwasi ya lokumu, ya likolo koleka, moko na basi ya likolo koleka oyo bazalaki na ekólo yango, abondelaki ye mpe alukaki kondimisa ye. Abalukaki, mpe mwasi yango akangaki ye, abendaki ye mpe alukaki kopwepwa ye. Kasi ye asalaki makasi na lolenge ete alongolaki ata kazaka na ye, mpe akimaki mosika na mwasi yango. Iyo, misié. Mpe ntango mobali na ye azongaki, bakóselaki ye makambo, balobaki ete ye moto ayaki kozua mwasi yango na makasi, mpe atikaki . . . mpe atikaki kazaka na ye kuna. Mpe mpo na yango, akotaki bolóko. Kasi, na bolóko, Nzambe azalaki elongo ná ye, ata batiaki ye esika nini.

⁶⁹ Azalaki etaliseli ya Mwana ya nkita. Nyonso oyo Yozefe asalaki efúlukaki. Ntango Yesu akozonga na Millennium, yango nde ntina oyo lisobe ekobimisa fololo lokola elanga ya

rose. Nyonso Akosala ekofúluka. Azali Mwana ya nkita. Epai nyonso botiaki Yosefe, epambolamaki. Epai nyonso Yesu azali, epambolamaka. Boye, tiá Ye na motema na yo mpe pambolamá.

⁷⁰ Boye tomoni sikawa, ete, Yosefe abwakamaki na bolóko. Mpe na bolóko, bato mibale bazalaki kuna; moko na bango abungaki, mpe mosusu abikisamaki. Yesu, ntango Amekamaki na ekulusu, moyibi moko abungaki mpe mosusu abikisamaki.

⁷¹ Ntango Atómbwamaki, Akendeki na loboko ya mobali ya Nzambe. Ntango Yosefe atombwamaki, akendeki na loboko ya mobali ya Fáló, mpe moto moko te akokaki kosolola na Fáló soki asololaki liboso na Yosefe te, mpo na kopesama nzela.

Mpe ntango Yosefe azalaki kolongwa na ndako ya bokonzi . . . Oh, la la! Ntango Yosefe azalaki kolongwa na ndako ya bokonzi, keleló eyúláki, mpe bato bazalaki kopota liboso na ye, koloba: “Bókumbamela ye! Yozefe azali koya!” Amen!

Mpe ntango Yesu akolongwa na loboko ya mobali na Nkembo na likoló, kelelo ekoyula. Mabólóngo nyonso ekogumbamela ye, mpe ndemo nyonso ekoyambola: “Yesu azali Koya!” Ya solo mpenza! Kasi soki . . .

⁷² Mpe, bómikanisela, ntango bandeko na ye baboyaki ye, asalaki nini? Abalaki mwasi ya Mabota; abalaki mwasi Moejipito. Ntango Yesu alongolamaki na kati ya bandeko na Ye kuna, Bayuda, Abalaki Mwasi ya Mabota. Kasi sikawa, nsima na mibu, nsima na bana kobotama, Efalaima ná Manase, azalaki na libota.

⁷³ Bongo, mokolo moko, bandeko na ye bayaki kotala ye. Bótala malamu. Toyebi lisolo yango, ndenge oyo akotisaki eloko ya moke kuna na kati, mpo bázonga na yango. Mpe asalaki lokola ayebi koloba monoko na bango te; azuaki molimboli, mpo na Kiebéle, nzokande ye moko azalaki Moebéle. Mpe ndeko na bango nde bayáki kuna. Bayebaki ye te. Akómaki mokonzi na nguya.

Mpe sika-sikoyo, Klisto ayei kotala Bayuda, kobikisa babeli na bango mpe nyonso wana, mpe ata bongo bazoyeba te Nani Ye azali, Masiya yango.

Tóbanda na molongo ya 27 ya mokapo ya 44.

*Moombo na yo tata na ngai alobaki na biso ete:
Boyebi ete mwasi na ngai abotelaki ngai—mwasi na
ngai abotelaki ngai bana mibale ya mibali:*

Mpe moko na bango asili kotika ngai, . . .

Wana ezalaki Yosefe, moto mpenza oyo bazalaki kosolola na ye.

*. . . mpe nalobaki: Solo ete apaswami na biteni; mpo
ete namoni ye lisusu te kino lelo:*

Mpe soko bokolongola na ngai mpe oyo, mpe mabe ekokwela ye, bokokitisa nsuki na ngai ya mpembe na mpasi na nkunda.

⁷⁴ Bazalaki na Benyamina moke kuna, leki na ye ya mobali. Boyebi nani Benyamina atalisaka? Lisangá ya sika oyo, ya Bayuda ya solosolo, oyo bazali kosangana kuna sikawa mpo na kokokisa bato nkóto mokama na ntuku minei na minei, li—libota oyo nde ezali kosálema sikoyo. Babúbi oyo ya Wall Street te, te, te; bango babongi na kobetama masási. Baoyo wana bazali Bayuda te. Baoyo wana bazali Bayuda te. Bayuda ya solosolo, ezali ba-Benyamina mike oyo bazali koya kolongwa kuna, mpe batikálá ata koyóká Liloba ya Yesu Klisto ata moke te.

Sikawa yango wana zónge epai na ngai . . . mpe tata na yo . . . mpe tata na ngai, mpe mwana azali na biso elongo te; lokola bomoi na ye ekangani na bomoi na mwana;

⁷⁵ Bomoi mpenza ya Nzambe ekangani ná Yisraele. Abálána na ye. Tokokóma na likambo yango nsima na miniti moke, soko Nkolo alingi. Abálána na Yisraele. Bomoi na Ye ekangáná na ye. Kaka ndenge ngai nakangáná na Mrs. Branham, kuna na nsima, mwasi na ngai, mpe yo okangáná na mwasi na yo. Bomoi na yo ezingami kati na yango. Mpe Nzambe abáláná na Yisraele. Mpe ezalaki nini? Yakobo alobaki: “Bomoi na ngai ezingami mpe ekangáná na mwana oyo. Nako . . .”

Mpe ekosalema ete, wana ekomona ye ete mwana azali ná biso elongo te, . . .

Yosefe alingaki kotikala ná mwana yango, boyebi. Toyebi lisolo yango.

. . . mpe akokufa, tata na ye: mpe baombo na yo bakokitisa nsuki mpembe ya moombo na yo, tata na biso, na mawa na nkunda.

Bóyoka ndenge Lúbene akómi kobondela sikawa.

Mpamba te moombo na yo akomi, ndanga ete mwana oyo, epai na yo . . . epai na tata na ngai, nalobi ete: Soko ngai nakozongisa te . . . kozongisa ye epai na yo te, mbe nakoláta ekweli na miso na tata na ngai seko.

Sikawa, na bongo, nabondeli yo, tika moombo na yo átikala na esika na mwana . . .

Oh, la la! Bomoni, atele mi wana mpenza liboso na Yosefe, ndeko na ye. Yosefe ye oyo, kasi ayebi ye te. Oh, bózéla kino Millennium wana ébanda, ndeko!

. . . sikawa na esika na mwana kotikala lokola moombo na nkolo na ngai; . . .

Bóyoka ye, kobenga ye “nkolo.”

. . . mpe tika mwana ázonga ná bandeko na ye elongo.

Mpo ete ngai nakozóna epai na tata na ngai boni soko mwana yango azali ná ngai elongo te? Nabangi kotala mabe yango ekokitela tata na ngai.

⁷⁶ Akómaki kobondela, kopesa bomoi na ye moko! Bayuda yango bakozala mpenza wana, ná maboko na bango etómbwami! Bótala. Bótala sikawa molongo, ya 45...Bóyoka na bokebi, bózanga yango te. “Ntango Yosefe akokaki...”

Bongo Yosefe akokaki te...-mipekisa—komipekisa liboso na baoyo nyonso batelemaki elongo na ye;...

Ndeko, na ntango wana nde lisumu ekosukisama. Kozanga kondima ekopalangana.

...mpe agángaki, mpe asalaki ete bato nyonso bálungwa...mosika na ye. Boye moto atikalaki na ye elongo te wana emiyebisaki Yosefe ye mpenza epai na bandeko na ye.

⁷⁷ Ezali nini? Ata mwasi na ye moko azongaki na ndako ya bokonzi. Oh, la la! Mwasi na libala akozala na Nkembo, wana Yesu akozonga (Tokomona yango awa.) mpo Ámiyebisa.

Alelaki na mongongo makasi:...

Yosefe akokaki lisusu kokanga motema te, agángaki.

...Baezipito mpe ndako na Falo bayokaki yango.

⁷⁸ Kino kuna na ndako ya bokonzi, bayokaki Yosefe kolela. Sikawa, wana ezalaki etaliseli ya Klisto, kokutana ná Bayuda, wana, Ayebi ete Abomaki bango miso mpo biso tózua libaku malamau. Kasi ntango Akozonga epai na bango, lisumu ya Yisraele ekosila.

Mpe Yosefe alobelaki bandeko na ye ete: Nazali Yosefe;...

Bokanisi ete Yesu akoloba nini? “Nazali Masiya na bino. Nazali Moto oyo bobakáki na ekulusu.”

...nde tata na ngai azali naino na bomoi? Nde bandeko na ye bakokaki kozongisela ye maloba te; mpo bazalaki na nsomo liboso na ye.

⁷⁹ Oh, nasengeli kotelema awa mwa moke. Tózua Zekalia na mokapo ya 12. Bóbalola elongo na ngai, sikawa, na Buku ya Zekalia, mokapo ya 12 ya Zekalia. Mpe ntango mosusu nazozua ntango mwa mingi koleka mpo na kobanda koteya oyo, kasi na—nazolikia ezali bongo te. Mpe na—nalingi mpenza ete bósosola yango.

⁸⁰ Zekalia, tózua mokapo ya 12 ya Zekalia, mpo tómona eloko nini Akoloba, sikawa, ntango Akotelema liboso ya bandeko na Ye. Zekalia 12, molongo ya 10. “Kosilisa lisumu,” sikawa. Malamau, mokapo ya 12 mpe molongo ya 10.

⁸¹ Bótala. Sikawa, awa, azali koloba na ntina na litiká; kozingama ya Yelusaleme; nyama mpe mampinga oyo

elongolami, mpe bongo na bongo; makambo nyonso ekómi na nsuka sikawa; ekómi pene na Millennium, Millennium elingi kobanda sika-sikawa.

Nakosopa likolo na ndako na Dawidi mpe likolo na bifándelo ya Yelusaleme, molimo na (nini?) ngolu . . .

Amen! Ngolu ya kokamwa!

. . .likoló na ndako . . .bafándi na Yelusaleme, (“engumba mosantu” ya Danyeale), molimo na ngolu mpe na malombo: mpe bakotala epai na ngai oyo batobolaki, mpe bakolela ye, ndenge balelaka mwana na likinda, bakolela ye na mpasi na motema, lolenge balelaka mwana mobali ya liboso.

⁸² Bóyoka, ekozala matánga mpenza, ntango Akozala kuna, ntango Akomiyebisa epai na bango, lolenge Yosefe asalaki! Bóyoka.

Mpe na mokolo yango bileli ekozala mingi mpenza na Yelusaleme lokola bileli na Adad- . . .

Nakoki koloba nkombo yango te, A-d-a-d-a-l-i-m-o- . . .

. . .Adadalimone na . . .Megido—Megidono.

Mpe na mokili kolela ekozala, libota na libota na esika na yango; libota ya ndako na Dawidi na esika na yango, mpe basi na bango na esika na bango; mpe libota ya ndako na Natana na esika na yango, mpe mabota na bango na esika na bango;

Ndako . . .na Lewi . . .basi mpe mabota na bango na esika na bango; . . .mpe Simeona ná bato na bango na esika na bango;

Mpe mabota nyonso oyo etikali, libota moko na moko . . .ná basi na bango na esika na bango.

⁸³ Bakomiyoka mpenza nsoni mingi, ntango bakozala wana mpe bakomona ete Moto mpenza oyo babakáki na ekulusu mpe bawanganaki, ateleme wana, Yosefe na bango moko, ya motuya. Ekozala mpenza matánga ndenge wana! Mpe bakoloba: “Bilembo ya mpota wana Ozuaki yango wapi?”

⁸⁴ Alobaki: “Na ndako ya baninga na Ngai.” Bomoni eloko nini nalingi koloba? Mpo na kosilisa lisumu, kozanga kondima, yango nde ntina oyo Azali koya.

⁸⁵ Mpe mobu ya ntuku nsambo ya Danyeale oyo, mpóso ya ntuku nsambo, nde, koya mpo na kosilisa lisumu, kolongola yango. Bososoli sikawa? Ya liboso ezali nini? “Kosukisa mabe.” “Kosilisa lisumu.” Motango ya misato: “Kolimbisa lisumu na nko.” Mpo na bino baoyo bozali kokoma yango.

Nazalaki na pene na Makomi motoba mosusu wana, kasi napumbwi yango, mpo molungé ezali. Tolingi kozua ntango

mingi koleka te. Nalingi kozua nyonso oyo nakoki kozua, kasi koumisa bino mingi koleka te. Malamu.

⁸⁶ “Kolimbisa lisumu na nko.” *Lisumu na nko* ezali “kosala mabe,” ndenge basálaki na ekulusu. Alimbisaki yango, kasi ekosalelama mpo na bango te. Esalelamaki na bango te. Mpo na nini? Mpo babomamaki miso mpe bakokaki komona yango te. Mpe mpo na nini bakufaki miso?

Okoloba: “Malamu, ntango mosusu, lelo . . . ezali mpo nazali mokúfi miso.” Ozali mokúfi miso mpo olingi yango. Bakufaki miso mpo Nzambe abomaki bango miso. Kasi okúfi miso mpo yo olingi yango. Kolimbisama ezali te mpo na yo. “Soki ondimi te ete Ngai nazali Ye,” elobaki Yesu, “okokufa na lisumu na yo.” Ya solo.

⁸⁷ Sikawa tózonga na Zekalia lisusu, mokapo ya 13. Sikawa tóyoka awa. “Kolimbisa.” Sikawa, esika oyo . . . Nazalaki koluka moto moko, áyoka oyo—áyoka oyo, kasi ntango mosusu Nkolo akosala yango na lolenge moko boye.

Na mokolo yango . . .

⁸⁸ “Na mokolo yango.” Dr. Scofield, awa, na ndimbola na ye, to na motó ya maloba na ye: “Litíká . . . Litíká ya baoyo babongoli motema bamemamaki na ekulusu.”

⁸⁹ “Mpo na kolimbisama ya lisumu na nko.” *Lisumu na nko* ezali “likambo oyo osalaki ya mabe, oyo oyebaki malamau koleka, ete osengelaki kosala yango te.” “Soki nakáni lisumu na nko na motema na ngai, Nzambe akoyoka ngai te.”

⁹⁰ Sikawa, na Zekalia mokapo ya 13, tóbanda na molongo ya 1—na oyo ya 1.

Na mokolo yango, liziba moko ekofungwama kati na ndako ya Dawidi mpe na bafandi na Yelusaleme mpo na lisumu mpe . . . mbindo.

⁹¹ Ndako moko ekofungwama. Kende liboso; tokokaki kokoba kotánga yango kino na nsuka. Nalingi ete bókoma yango mpo bótánga yango. Kasi sikawa, nakomaki awa ete tokobanda na molongo ya 6 mpe tokotánga kino na 10. Malamu, tótánga yango sikawa mpo tómona, tótánga kino na 9, kutu.

Mpe moko akoloba na ye, ete esika . . . Mpota oyo kati na loboko na yo nini? Bongo ye akozongisa ete, Yango . . . oyo ngai nazali na ezalaki . . . (Tótala naino.) . . . koyanola, Yango ezokisami ngai na ndako ya baninga na ngai.

Olamuka, E mopanga, telemela mobateli ya mpate, mpe moto oyo azali mozalani na ngai, YAWE na bibele alobi bongo, béta mobateli mpate, mpe bampate bakopalangana: mpe nakobalola loboko na ngai epai na baoyo mikié.

⁹² Sikawa, Yesu azongelaki Likomi yango. Bomoni, “Béta Mobateli-mpate, mpe bampate bakopalangana.” Kasi bótala molongó oyo elandi. Alobelaki kaka eteni na yango mpenza. Kasi bótala oyo elobami na lisakola oyo elandaki yango, na eteni oyo elandi yango. “Mpe Nakobalola loboko na Ngai epai baoyo miké.” Nini? Lisanga ya Benyamina oyo ezali kobima sikawa. “Nakobalola loboko na Ngai epai na baoyo mike.”

⁹³ “Beta Mobateli-mpate.” Yisraele, liboso, Yisraele abetaki Mobateli-mpate, bampate bapalanganaki na mokili mobimba. Kasi Nzambe alobaki: “Nakobalola loboko na Ngai, mpo na kozua baoyo miké wana na ntango ya nsuka.” Na ntango nini? Ntango lisumu na nko ekosila kolimbisama.

⁹⁴ Yisraele bakobika, bango nyonso. Tózua Yisaya. Yisaya, mokapo ya 66 ya Yisaya, tótánga mwa moke. Tokomona oyo Nzambe alobi na ntina na lobiko ya Yisraele, ekozua ntango boni mpo na kobikisa Yisraele. Bótala lolenge oyo ekosalema noki-noki. Na Yisaya, mokapo ya 66, molongo ya 8. Soki bolingi kotanga mobimba na yango, malamu.

Nani asili koyóká likambo ya lolenge oyo? Nani asila komóna likambo ya boye? Mokili ekobótama mpe kobota...mokolo moko...na mokolo moko? ...mpo bobele ntango oyo Siona azuaki mpasi ya kobota, abotaki bana na ye.

⁹⁵ Bobele ntango Siona amonaki ete oyo wana nde Masiya na bango, abotamaki mbala ya mibale, na mokolo moko. “Kolimbisa masumu, mpe kolimbisa lisumu na nko, mbindo.” Oh, la la! Basalaki eloko oyo ezalaki mabe, oyo ezalaki mabe mingi. Bolimbisi epesamaki mpo na lisumu na nko.

⁹⁶ Motango ya minei. “Mpo na kokótisa boyengebene ya lobiko na lobiko.” Yango nde likambo ya minei oyo Ayelaki. Ya minei, oyo Ayaki kosala: “Ko—kokótisa boyengebene ya lobiko na lobiko.” “Kosilisa lisumu; kolimbisa; mpe kokótisa boyengebene ya lobiko na lobiko.” Ntango mabe ya Yisraele ekosila... Ntango mabe ya Yisraele...

⁹⁷ Sikawa toko...Nalingi ete bósimba likambo oyo, mpo, ntango tokoloba mpo na mwasi wana, ná kobwakama ya dalagóna, bokozonga na Likomi moko oyo lisusu. Bóndimisama ete bokomi Yango. Ntango mabe ya Yisraele ekosila, Satana, oyo azali mofúndi na bango mpe mofúndi na biso, Satana akokangama na kati ya libulu na bozindó. Na ntango nini? Ntango boyengebene ya lobiko na lobiko ekokóta, eloko oyo ekoki kosila te, nyonso oyo ezalaki kozangisa boyengebene ekosila nye.

⁹⁸ Tózua Emoniseli mokapo ya 20, molongo ya 13, mwa moke, mpe tótánga awa mwa moke. Emoniseli 20, mpe 13...Te, bólimbisa ngai. Ezali nde Emoniseli...1 kino 3. Namonaki mwa

elembo wana te, na katikati na yango. Motoki na ngai ekoti ngai na miso. Emoniseli mokapo ya 20, tótala naino.

Namonaki Mwanje kokita na likolo, azalaki na mafungóla ya libulu bozindo mpe monyolólo monene na loboko na ye.

. . . asimbaki dalagóna, ye nyoka yango ya kalakala, oyo azali zabolo, mpe Satana, mpe akangaki ye na monyolólo mibu nkóto,

Mpe abwakaki ye na libulu bozindo, mpe azipaki yango, mpe atiaki elembo likolo na yango, na ntina ete ázimbisa ekólo lisusu te, kino nsuka na mibu yango nkóto: nsima na yango. . . basengeli kokangola ye mwa ntango moke.

⁹⁹ Kosala oyo ya seko. . . “Kokótisa boyengebene ya lobiko na lobiko,” Satana na kati ya libulu na bozindo. Ntango Ye asali bongo, akangi zabolo oyo azalaki kozimbisa bato.

¹⁰⁰ Sikawa tózonga na Abakuku, na mokapo ya 2. Abakuku, mokapo ya 2. Sikawa tokomona mpo na nini Akangaki nyoka ya kalakala oyo, mpe ntina oyo esalemaki, mpe likambo nini ekosalema mbala moko nsima na ye kokangama nye. Nasepelaka na oyo, bino te? E—ememaka biso na boyebi ya likambo moko. Abakuku, Abakuku, mokapo ya 2, molongo ya 14, nakanisi ete ezali yango nde nalingi kotánga. Ntango likambo oyo ekosalema. . . Bótala malamú.

Mpo mokili ekotondisama na boyebi mpe nkembo na Yawe, lokola mai ezipaka mai-na-monana.

¹⁰¹ *Brrrrrr!* Oh la la! *Whaou!* Na elobeli mosusu, ntango moyini alongolami, nsuka na lisumu ekomi, boyengebene ya lobiko na lobiko ekoti, Satana akangami na kati ya libulu bozindó, mpe boyébi na Nkolo ekoziba mokili lokola mai ezipaka mbu. Amen! Nkembo na Nzambe! Ezali koya, ndeko, ezali koya! Basi bakokóma basi ya lokumu, mpe mibali bakokóma mibali ya lokumu. Amen!

Ntango boyébi na Nkolo ekotondisa mokili,
mbu mpe likoló;
Mpe, oh, motema na ngai ezali konguluma,
kolela mokolo kitoko ya lisiko wana,
Ntango Yesu na biso akozonga lisusu na mokili.

¹⁰² Amen! Malamú. Sikawa, na ntango yango, Millennium ebandi. Ezali ntango wana nde Millenium, ntango oyo Engumba esengeli kotongama. Ya minei. . . Natikali na Makomi pene na motoba, kasi tokosala noki-noki. Sikawa, ntango tokozonga, nakozua Makomi mosusu oyo; kasi ezali kaka mpo na kopesa bino likanisi yango na mobimba.

¹⁰³ Motango ya mitano. “Mpo na kokanga emononeli mpe lisakoli na elembo.” Bomoni, Mwanje yango ayaki mpo na kokanga emononeli mpe lisakoli na elembo.

Na—Nalingaka koloba yango te. Kasi, mokomi monene moko, oyo nazalaki kotánga ye mokolo mosusu, abúlunganisaki yango mpenza! Alobaki “Oyo ezalaki. . .”

Sikawa, kaka mpo na kotalisa bozoba. . . Oh, bólimbisa ngai, nalingi koloba bongo te. Bólimbisa ngai. Nakáni yango te, nakánaki yango ata moke te. Te. Mo—mo—moto oyo azangi epakweli, bomoni.

Moto yango alobaki: “Bomoni awa ete bimononeli mpe lisakoli epesamaka ntango nyonso na lingomba ya Bayuda.” Mpe alobaki: “Kobandá ntango ya Danyele, ntango Danyele ayaki, elingaki koloba ete bakozala lisusu na bimononeli te ná lisakoli te.” Alobaki: “Makambo nyonso oyo bazali kolobela lelo, na ntina na kozua bimononeli ná masakoli, nyonso wana ezalaki eloko ya zabolo,” ete “eloko lokola bimononeli mpe masakoli ezalaka te.”

Ndeko, ezalaki na basakoli pene zomi na mibale nsima na Danyele. Mpe ezalaki na Yoane Mobatisi. Ezalaki na Yesu Klisto. Basakoli bazalaki na Kondimana na Sika mobimba. Bimononeli ezalaki. Banje bazalaki.

Ndenge nini mpenza moto akoki koloba bongo? Kasi, bomoni, oyo wana ezali na makanisi ya moími, komeka kondimisa bato likambo na makasi, kokómisa yango mwa malakisi ya lingomba, to mwa eloko moko boye, mpo ékóma likambo ya solo epai na bato. Mpe soki bato yango bazali na Molimo Mosanto te, bakozimbisama na yango.

¹⁰⁴ Sikawa, tózua te oyo moto moko alobaki. Sikawa, ezali na Likomi moko te, mpo na kondimisa yango. Boye, ndenge nini nakokaki kozua yango? Malamu, tóluka koyeba eloko nini kokangama na elembo ezali mpenza. Botala malamumu! Ayaki mpo na kosala yango, mpo na kokanga emononeli mpe lisakoli na elembo.

¹⁰⁵ Sikawa, tózóngá lisusu na Buku ya Danyele, esika oyo tozalaki. Na Buku ya Danyele, tokomona mpenza nini Yango elobaki. Sikawa tozua Danyele mokapo ya 12. Sikawa, wana tozali koluka Daniel 12, sikawa, tokoki kobanda. Kotánga kobanda na. . . Ntango bokozonga na bandako, nalingi ete bótánga kobanda na molongo ya 1. Tótánga kaka kobanda na molongo ya 1, kino na ya 4.

Na ntango yango Mikaele akotelema. . . mokonzi monene oyo akotelema mpo na bana ya libota na yo: . . .

Sikawa, oyo ezali na ntango ya nsuka.

. . . mpe ntango na bolozí ekozala, lokola ezalá naino te longwa. . . na ekólo. . .

Ezali ntango wana nde motemeli-na-Klisto, momati-mpunda ya Elembo ya Liboso akei, ntango abandi mosala.

. . . ata kino *ntango* oyo: . . .

Ezali te na ntango Titus azuaki bitutú ya Yelusaleme. Ezalaki kaka na esika moko. Bótala ntango motemeli-na-Klisto oyo, mokonzi oyo asengelaki koya, bótala ntango akoya.

. . . *kino na ntango yango: mpe na ntango yango libota na yo bakobikisama, moto na moto oyo akomami na buku.*

Aleluya! “Libota na yo,” Yisraele, “bakokomama na buku moko.”

Mpe mingi na baoyo balali na kati na mputulú na mabelé bakolamuka, bamoko mpo na bomoi na seko mpe bamosusu mpo na nsoni mpe kotiolama ya seko.

¹⁰⁶ Ekokaki kosalema ndenge nini ntango Titus azuaki bitutú ya Yelusaleme? Ekokaki kosalema ndenge nini? Ekokaki kosalema te. Bomoni, azali koloba mpo na ntango na nsuka, na lisekwa. Ezali bongo? Sikawa:

Mpe baoyo bakozala na mayele bakongenga lokola nkembo na likolo; mpe baoyo babongoli mosika. . . baoyo babongoli bato mingi na boyengebene. . . minzoto, seko na seko. . .

Bóyoka! Yango oyo, kokangama na elembo ya solosolo, oyo ya solo.

Kasi yo, E Danyele, bómbo maloba, mpe kangá buku yango na elembo, kino na ntango ya nsuka: . . .

¹⁰⁷ Ezali nini? Oh, aleluya! Bozali komona yango, kelasi? Emoniseli oyo ya Yesu Klisto, mpe ya Nguya na Ye, ya Boyei na Ye, ya ntango na nsuka, ekangamaki na elembo kino na ntango oyo. Yango nde Ayaki kosala. Ebómbámá mosika na bato ya mayele mingi; Kokamwa te ete balingaka kozongisa “kokangama na elembo” na ntango ya kala, na “ata mosakoli moko te,” mpe nyonso wana, na ntango ya kala. Ekosimba te. Kasi emononeli, emononeli oyo, ekangámáki na elembo kino awa, sikoyo. Mpe wana nde epai nazali kotia kondima na ngai, ete Nzambe akomonisa mpóso ntuku nsambo yango. Amen! “Kanga yango na elembo,” Alobaki, “kino na ntango ya nsuka. Bómbo Maloba yango mpe kangá Buku na elembo kino na ntango ya nsuka.”

¹⁰⁸ Asalaki nini? Mpo na kokanga emononeli ná lisakoli na elembo! Danyele moto asakóláká makambo oyo. Amónáká yango na emononeli, mpe Mwanje akitaki mpo na kokanga emononeli yango na elembo, mpe kokanga lisakoli na elembo. Bakoki kotánga yango, kasi bakoki kososola yango te, kino na ntango ya nsuka. Ntango ya nsuka, ntango ya nsuka ezali nini? Nsuka ya mpóso ya ntuku nsambo, ntango mokonzi wana, motemeli-na-

Klisto, akomonisama, na ntango oyo, azali komikómisa Nzambe. Toyebi ndenge nini ete ekangami na elembo kino na ntango wana? Danyele autaki kosilisa; oyo nde mokapo ya nsuka ya Danyele.

¹⁰⁹ Ndeko mwasi Simpson ayebisaki ngai nsima na nzángá oyo, alobaki: “Ndeko Branham, natángá Buku mobimba ya Danyele. Na—nayebaki ata eloko moko te, ntango natelemaki, ntango nasilisaki, koleka oyo nayebaki ntango nabandaki.” Yango oyo, Ndeko mwasi Simpson, soki ozali awa na mpokwa oyo. Nakanisi ete nazomona ye afandi kuna. Nalobá ata eloko moko te na kati ya caravan. Nafandaki na ngai kimia, mpo nakanisaki ntango mosusu nakolobela yango.

Kasi, emononeli oyo Danyele amonaki, kuna pembeni na ebale, ekangamaki na elembo “kino na ntango ya nsuka.” Ezali. . . Bótika nákoba kotángá yango awa. Bomoni?

Kasi yo, E Daniele, bómbo maloba yango, mpe kanga buku na elembo, kino na ntango ya nsuka: mingi bakopota bipai na bipai, mpe boyebi ekofúluka.

Mpe ngai Danyele, natalaki, mpe, tala, mibale. . . batelemaki, . . . moko na libongo moko. . . ya ebale, mpe moko na libongo mosusu ya ebale.

Mpe moko na bango alobaki na moto oyo alátaki mo—molikani, oyo atelemaki na likolo na mai ya ebale ete: Ekozala ntango molai boni kino nsuka na bikamwiseli oyo?

Sikawa bóyoka.

Mpe nayokaki oyo elobaki moto oyo alataki molikani mpe atelemaki na likolo na mai na ebale, atombolaki loboko na ye ya mobali mpe loboko na ye ya mwasi epai na likolo, mpe akátaki ndai na nkombo na ye oyo azali na bomoi libela na libela ete ekozala mpo na ntango moko, ntango, mpe ndambo na ntango; . . .

Sikawa, tokómi mpenza—mpenza wana, na “Ntango, ntango, mpe ndambo ya ntango.” Sikawa bótala malamú ntango tokokóma na mpóso ntuku nsambo ya Danyele, ndenge nini yango ekosuka. Ezali na ntango wana nde libombami ekomonisama. Malamú. “Ntango, ntango, mpe ndambo na ntango.”

. . . mpe ntango ye ako. . . (“ye” likitana bomei, sikawa, motemeli-na-Klisto) . . . akosila kobu. . . kobuka kobuka nguya na bato na bulee, (ezali ntango wana nde akobuka boyokani na ye na katikati ya mpóso), makambo oyo nyonso makosila kokisama. (Amen.)

Nayokaki yango, nde nasósolaki te: bongo nalobaki ete, E. . . Nkolo, nsuka ya makambo oyo ekozala nini?

Alobaki ete, Kende na yo, Danye: mpo ete maloba yango mazipami mpe makangami na elembo kino ntango ya . . . [Losambo balobi: "Nsuka."—Mok.]

Oh, bóbosana yango te!

. . . kino ntango ya nsuka.

Bato mingi bakopétolama, mpe bakoyeisama mpembe, mpe bakosokolama; kasi bato mabe bakosala makambo mabe, mpe moto mabe ata moko te akososola; kasi bato na bwanya bakososola.

¹¹⁰ Nsango ya ntango na nsuka ekomonisa yango; eleko ya lingomba ya nsuka. Nkembo! Whew! Ezali yango mpenza! Oh, la la! Ezali koléngisa ngai, mpo na kokanisa yango, libombami! Makambo oyo mokili ya mangomba ezali kobeta miso, mpe koloba: "Ezali bolémá." Libombami ya Nani Yesu Klisto azalaki; Moto ya misato te, Moto ya mibale te, Moto ya misato te, kasi Moto *yango* ya Nzambe. Mabombami mosusu Nyonso oyo ya Nzambe ekomonisama, mpo ekomami awa na Buku oyo, mpe ekomonisama na ekeke ya ntango ya nsuka. Bakoki komona yango na makindó, na ba-kelasi, ná ba-denomination te, koleka ndenge Bayuda bazangaki komona ete Yesu azalaki Masiya. Kokamwa te ndenge bamekaka kokanisa ete bobéli libóma. Kokamwa te ndenge bakanisaka ete bozali na bolema. Kokamwa te ndenge basosolaka te mpo na nini odódaka elongo ná bango te. Mpamba te, Nguya moko mpe emoneli moko ezali nsima na yango, Liloba na Nzambe oyo esili komonisama, mpo na kotia Lingomba na molongo mpo na Konétolama, mpe bokei na Ndako. Iyo. "Bato mingi bakopota bipai na bipai, mpe boyébi ekofúluka." Ya solo mpenza.

¹¹¹ Sikawa, likambo mosusu nini ekoyebana? Bótala mangomba lelo. Yango oyo. Nabanzi ete ezozokisa te, kasi nasengeli koloba yango. Komikomisa . . .

¹¹² Na mokolo yango, motemeli-na-Klisto akomonana.

¹¹³ Sikawa, bómikanisela, ntango tokokóma na Bilembo, motemeli-na-Klisto wana akotambola na kati ya Bilembo yango. Danye alobaki yango awa: "Mokonzi oyo akoya." Akolongolama, Yesu akolongolama, mpo na kolimbisa masumu ya bato. Kasi: "Mokonzi oyo akotelema, oyo akomema mbindo mpo na libebi," ezalaki nde Roma, na nzela ya Titus. Na mbala oyo, mokonzi oyo auti na Roma nde akosala yango. Mpe akomonisama na ntango ya nsuka, sikawa bóyoka, "komikómisa ye moko Nzambe," ndenge Molimo Mosanto akebisi biso na Batesaloniki ya Mibale, mokapo ya 2.

Tózua yango naino, Batesaloniki ya Mibale, na bongo, bokozua liloba na ngai te, kasi Liloba na Nzambe. Batesaloniki ya Mibale, mokapo ya 2, molongo ya 12. Tótala. Batesaloniki ya Mibale, mokapo ya 2, molongo ya 12. Tótala. Tóbanda likoló na yango, na molongo ya 7.

Mpo libombami ya lisumu na nko esili kobanda kosala mosala: . . .

(Paulo nde azali koloba, na nzela na Molimo Mosanto.) . . .

bobele—bobele kino ye oyo azali kopekisa akolongwa na nzela.

Nani nde “Ye” awa? Moto moko ayebi? Molimo Mosanto: “Ye oyo azali kopekisa.”

Bongo (ntango) Moto na kanza akomonisama, . . .

Ntango nini? Kaka na ntango oyo Molimo Mosanto akolongolama, etikali moke ákende sikawa. Azali kokende mpo na nini? Akomema Lingomba elongo ná Ye. “Akomonisama!” Paulo moto azali koloba, na nse ya mpéméla.

. . . ye oyo Nkolo akoboma na mpéma na monoko na ye, mpe akobebisa ye nye wana ekomonana ye na ntango ya koya na ye: (moto na kanza, na ntembe te)

Kasi koya na ye moto na kanza ekozala mpo na mosala na Satana, mosala na nguya nyonso mpe na bilembo mpe na bikamwiseli na lokuta,

“Biso tozali lingomba ya monene koleka. Tozali na oyo. Tozali na oyo. Bino nyonso bósangana elongo,” bomoni. “Biso nde toleki monene.” Bikamwiseli ya lokuta!

Mpe na bizimbiseli nyonso . . . ya mabe mpo na bango bakobeba nye; mpo baboyaki koyamba bolingo na solo mpo na lobiko na bango.

Bongo Nzambe asili kotindela bango nguya na kopengwisa mpo na kondimisa bango lokuta,

Mpe ete bango . . . bákweisama baoyo bandimi makambo na solo te kasi basili basepeli kati na mabe.

¹¹⁴ Bosósoli yango? Oh, la la! Sikawa, Paulo moto azali koloba. Na ntango oyo Elembo ya Nzambe ezali komonisama, Molimo na Ye, Nkombo na Ye, ngolu na Ye, mabombami nyonso mosusu ya minene oyo ezali komonisama sikawa, miango mpo Lingomba na Ye ékende na Konétolama; kosopana ya Molimo Mosanto esili kosala likambo oyo. Yango nde oyo Asili kosala na mikolo ya nsuka.

¹¹⁵ Sikawa, tótala. Tozali na ntango mpo na oyo moko ya nsuka? [Losambo balobi: “Amen.”—Mok.] Oyo ya motoba: “Kopakola oyo-aleki-Likolo.” Oh, la la! Yango oyo nde! Likambo ya nsuka oyo Asengeli kosala, ezali nini? Sikawa, tózonga na Danyelee, mpo tómona nyonso oyo Asengeli kosala bobelee awa. “Mpóso ntuku nsambo.” Nini esengeli kosalema na ntango oyo? Malamu.

. . . ekatami mpo na libota na yo mpe . . . engumba mosanto na yo, mpo na kosukisa mabe (mabe ya libota), . . . mpo na kosilisa lisumu (mpo na bato), mpo na kolimbisa lisumu na bango ya nko, mpo na kokótisa

boyengebene ya lobiko na lobiko (mpo na Bayuda), mpo na kokanga emononeli mpe lisakoli na elembo (kino na ntango ya nsuka) mpe na kopakola esika eleki Bulee.

Yango nde ntina motoba ya boyei na Ye.

¹¹⁶ Sikawa, “mpo na kopakola esika eleki Bulee.” Sikawa, oyo ekoki kozala mwa likambo ya ndenge, mpo na miniti moke, mpo na balakisi mingi kati na bino, kasi sikawa, bózila mwa moke, bokomona ndenge nini ekosuka.

¹¹⁷ Oyo ezali epakweli, ya moto te. Yesu asilá kopakolama. Ezali solo? Buku ya Misala elobi ete Nzambe apakolaki Yesu na Molimo Mosanto; Akendeki bipai na bipai kosalá bolamu, kobikisa babeli, mpe bongo na bongo. Yesu asilá kozala. Azali Masiya. Mpe *Masiya* elingi koloba “Mopakolami.” Ezali solo? Kasi awa na ntango ya nsuka, Asengeli kopakola Esika eleki búlee.

¹¹⁸ Nini nde ezali “esika eleki Búlee”? Na lolenge na ngai ya komona yango, oyo nandimi ete nakoki kotalisa yango na nzela na Likomi, ezali kopakola “esika eleki Búlee,” oyo ekozala Mongombo oyo bakosalela na eleko ya Millennium. Sikawa bóyoka, mpe bokomona mpo na nini nakomi na yango. Elimbolami na Ezekiele, mo—mokapo ya 4, mo. . . Te, nalingi koloba mokapo ya 43, molongo ya 1 mpe ya 6. Tózonga na Ezekiele mpo tómona ndenge nini atalisi Millennium, ndenge nini bakopakola e. . . Ezekiele 43, tótánga mwa moke awa sikawa mpo tómona eloko nini Akosala na Millennium, epakweli. Na Ezekiele 43, malamumu, sikawa tóbanda na molongo ya 1, kino ya 6. Bokoki kotánga mobimba na yango nsima na bino kokóma na ndako, na ntembe te, bino baoyo bozali kokoma, Ezekiele 43. “Na nsima. . .”

¹¹⁹ Sikawa, bótala malamumu, kotalisama ya Tempelo oyo ekotongama na Millennium. Sikawa, moto nyonso, motáangi nyonso oyo ayebi, ayebi ete kobanda na Ezekiele mokapo ya 40, kino na pene na mokapo ya 44, ezali eloko mosusu te, kaka Tempelo ya Millennium oyo ékotongama na mabelé, (moto nyonso ayebi yango, bomoni), ntango nkembo ya Nkolo ekotondisa yango, mpe bongo na bongo, lolenge wana. Sikawa toko. . . tokotalisa Tempelo yango na mokapo ya 43, molongo ya 1 kino ya 6.

Nsima akambaki ngai epai na ekuke, ekuke oyo etali na ngámbo ya ebimelo na ntango:

Mpe, tala, nkembo na. . . Nzambe ya Yisraele ekómaki longwa epai na ebimelo na ntango: mpe mongongo yango ezalaki lokola mongongo ya mai mingi: mpe mabelé engengáki na nkembo.

Mpe ejalaki komonana lokola emononeli oyo emonaki ngai, lokola emononeli oyo namonaki ntango nayaki kobebisa engumba, mpe emononeli yango ezalaki lokola

emononeli oyo emonaki ngai epai na ebale Kebale; mpe nakweaki na elongi na ngai.

Mpe nkembo na YAWE—nkembo na YAWE ekotaki ndako na nzela na ekuke oyo etali epai na ebimelo na ntango.

Bongo molimo etombolaki ngai, mpe ekotisaki ngai na lopango ya kati; mpe, tala, nkembo na YAWE etondisaki ndako.

Mpe nayokaki ye kolobela ngai longwa na kati ya ndako; moto yango atelemaki pembeni na ngai.

¹²⁰ Kopakola, kopakola Tempelo yango mpo na bokonzi ya Millennium. Sikawa bókoma Lewitiko. Sikawa bótala malamundo ndenge ebulisamaki na Lewitiko. Sikawa, soki tozongi na Lewitiko, tokomona ete Mose moto apakolaki tempelo. Tózonga naino kuna, wana tozali kolobela yango. Tozali na ntango ya kokoka mpenza. Tózonga na Lewitiko mpo tómona ntango Mose apakolaki tempelo, na Lewitiko mokapo ya 8.

¹²¹ Oh, nalingaka kokokanisa Makomi oyo na Makomi. Bolingaka yango, boye te? Na bongo nde bo—bokozua li—li—likanisi ya likambo oyo—ya likambo oyo tozali koluka mpe likambo oyo tozali kosala. Sikawa, bino nyonso boyebi ete tosalelaka Likomi mbala na mbala, mpo na yango.

¹²² Sikawa, mokapo ya 8 ya Lewitiko, mpe nakomaki awa, molongo ya 10. Bókoma Lewitiko 8:10. Tótala.

Mpe Mose akamataki mafuta na kopakola, mpe asopaki mafuta ya kopakola, apakolaki mongombo mpe biloko nyonso na kati na yango mpe abulisaki yango.

Mpe . . . amwangisaki ndambo na yango na etumbelo mbala nsambo, . . . apakolaki etumbelo mpe bisaleli na yango nyonso, mpe esukweli mpe etemelo na yango mpo na . . . mpo na kobulisa yango.

Asopaki . . . mafuta na kopakola na motó na Alona, mpe apakolaki ye mpo na kobulisa ye.

¹²³ Mose, na lisobé, abulisaki, to apakolaki mongombo ya kosambela, mpo na bana na Yisraele, ntango bazalaki kati na mobembo na bango. Epakolamaki.

¹²⁴ Sikawa, bózua na Ntango ya Mibale, tokomona kobulisama oyo, ntango Molimo Mosanto azuaki esika na Ye na mongombo, bótala eloko nini esalemaki sikawa. Na Ntango ya Mibale mokapo ya 5, tóbanda na molongo ya 13. Ntango ya Mibale mokapo ya 5, kobanda na molongo ya 13.

Mpe esalemaki . . . babéti na bakelelo mpe bayémbi . . . babimisaki mingongo lokola moto moko . . . kokumisa mpe kopesa matondi ya YAWE; banétolaki mingongo likolo, esika moko ná kelelo mpe bilonza mpe biloko na muziki, mpe kosanzola YAWE, mpe koyemba, Mpo ye

azali malamu; mpe boboto na ye ekoumela lobiko na lobiko, bongo ndako yango, ndako na Yawe etondaki na lipata;

Kino banganga batelemaki . . . banganga bayebaki kotelema te ete básala mosala mpo na lipata, mpo nkembo na Yawe etondisaki ndako na Nzambe.

¹²⁵ Nzambe akotaki na esika ya bulee oyo esengelaki kopakolama, mpe epesamelaki Ye mpo bato báya kosambela. Boye, ezali te mpo na kopakola esika “ya bulee na yo,” kasi mpo na kopakola esika “eleki Bulee.” Mpe tomoni, ete, Yelusaleme ya sika nde ezali esika “eleki Bulee.” Mpe epakweli ekozala likoló na Yelusaleme ya Sika oyo euti na Likoló, longwa na Nzambe, ebongisami lokola mwasi na libala oyo amibongisi mpo na mobali na ye. Epakweli ekozala likoló na bango.

¹²⁶ Sikawa, ntango Jelubabele abulisaki tempelo na ye, nsima na yango kotongama lisusu, epakolamaki lisusu te, mpo esiláká kopakolama; kasi ebukamaki, mpe etongamaki lisusu. Libébi ebebisaki yango. Etongamaki lisusu mpe etelemisamaki, boye, epakolamaki lisusu te. Lokola esiláká kopakolama mbala moko, ezalaki kokoba bongo, mpe ekokoba kino na ntango oyo mpenza. Kasi ntango Nzambe akotelemisa Mongombo ya Millennium, Akopakola esika eleki Bulee; ezali te “ya bulee na yo,” kasi “esika eleki Bulee.”

¹²⁷ Kasi ntango Mokonzi akozua Ngbendé na Ye mpo na mibu nkóto, (Nkembo!) esili mpo na ye, na ntango yango. Epakweli ya esika eleki Bulee ekozala likambo ya nsuka oyo ekosalema. Ntango Mongombo etongami; lisekwa esalemi; Bayuda bazongi na bango; Klisto ná Mwasi na libala na Ye bayei; Bayuda, nkóto mokama na ntuku minei na minei batiami elembo; Millennium esili kokóma. Epakweli moko ekozala ntango esika eleki Bulee ekopakolama; esika ya bulee, esika ya Bulee koleka nyonso, ná esika eleki Bulee. Na ntango, esika eleki Bulee ezali esika ya bulee, esika oyo Nzambe azalaki kofanda, katikati na Bakelúba. Mpe, na mbala oyo, Klisto nde akofanda na esika eleki Bulee, ná epakweli likoló na Ye. Mpe bakozala na bosenga ya mói te, kuna, mpo Mwana-mpate, na kati ya Engumba, akozala Póle. Moi ekolala ata moke te, na Engumba yango, ndenge mobange Noko Jim azaláká koloba. Ekolala ata moke te, mpo Klisto akozala Póle yango, Mopakolami. Mpe Mokonzi akoya mpe akofanda na Ngbende na Ye mibu nkóto moko, mpo na kokonza.

¹²⁸ Yilimia 3:12-18, na mobimba, tótánga yango. Na Yilimia mokapo ya 18, nandimi. Iyo. Te, mokapo ya 12, bólimbisa ngai, mokapo ya 12 ya Yilimia, tóbanda na—na . . . Yilimia 3, bólimbisa ngai. Yilimia 3, na—nakomaki yango awa, kuna, ntango nazalaki koyekola, Molimo Mosanto azalaki kokamba ngai longwa na esika moko kino na mosusu, nakomaki biteni yango, ndenge

nakokaki kokoma yango. Yilimia 3, na bongo 12 kino 18 yango mpe. Tótanga yango.

Kende kosakola maloba oyo epai na likolo ete, Yisraele, yo mozongi nsima, zónga, YAWE alobi bongo; mpe nakokweisa nkanda na ngai—na ngai. . . kokweisa nkanda na ngai likolo na bino te: mpo nazali na boboto, YAWE alobi bongo, nakobatela nkanda na ngai libela te.

Kasi, yambola masumu na yo, ete osaleli YAWE Nzambe na yo mabe, mpo opanzi nzela na yo epai na mopaya na nse na nzete nyonso mibesu, . . .

Yango nde oyo basili kosala, bauti na esti, westi, na bikólo nyonso. Bomoni?

. . . mpe otosaki mongongo te, mongongo na ngai te, YAWE alobi bongo.

“Bózonga!” Bóyoka likambo oyo.

Bózonga, E bana bazóngi nsima, YAWE alobi bongo; mpo ngai (n-a-b-á-l-a-n- -i) . . . nabalani na bino: . . .

“Miso na bango ebomamaki, mpo napesaki libaku malamumu na bato ya Mabota. Kasi, bózonga, mpo Nabalani na bino.”

. . . nakokamata bino, moko na engumba, mpe mibale na libota, . . .

Ezali te baoyo nyonso bamibengaka Bayuda nde bakokota. Kasi etónge oyo eponámá nde bakokota, Benyamina moke wana, oyo ayaki kuna, liboso na Yosefe, etónge oyo euti na bikólo nyonso, moko na engumba moko, mpe mibale na libota moko.

. . . mpe nakokamba bino kino na Siona:

Nakopesa bino mobateli mpate oyo abongi na motema na bino, oyo akoleisa yo na boyébi mpe na bososoli.

Mpe ekosalema ete, wana esili bino kofúluka mpe koya mingi na mokili, na mikolo yango, YAWE alobi bongo, bakoloba lisusu te ete, Sa—sanduku na kondimana na YAWE, ekozala lisusu kati na makanisi te, bakokanisa yango te; bako—bakokende epai na yango te; yango ekosalema lisusu te.

Na ntango yango, bakobenga Yelusaleme ete, ngbende na YAWE; (lokola Akozala kuna, bomoni), mabota nyonso bakosangana (aleluya) kati na yango, mpe nkombo na YAWE, epai na Yelusaleme, bakotambola lisusu te mpo na kolanda makanisi na mitema na bango ya mabe.

¹²⁹ Na ntango yango nde Engumba yango ekopakolama. Na ntango yango nde Yelusaleme ya Sika ekopakolama. Mpe bikólo nyonso ya Engumba. . . Na Emoniseli mokapo ya 22, elobami ete bikuke ekokangama te na butu, mpo butu ekozala kuna te. Mpe bakonzi nyonso ya mokili bakomema lokumu mpe nkembo na bango na Engumba oyo. Bitutú na Yango ekotongama na

mabanga ya yasipi ná saladí, na mabánga zomi na mibale; mpe bikuke zomi na mibale ekosalema na liyaka moko ya mobimba, moko na ekuke moko moko. Ntina ya mwinda ekozala te, kuna. Pole ya mói ekozala lisusu kuna te, mpo Mwana-mpate oyo akozala na katikati ya Engumba akozala Póle yango. Mpe Akokamba libota na Ye kino na Bomoi ya seko. Nzete mibale ekotelema kuna, moko na ngámbo moko na moko ya ebale, ekozala mpo na lobiko na nzoto ya bikólo. Wana nde Mopakolami yango, oyo akoya, Engumba Mosantu oyo ekokita longwa na Nzambe, uta na Likolo, kino na mabelé.

¹³⁰ Tózua sikoyo eloko nini ekosalema na ntango yango. Oh, bolingi yango? Tózua Yisaya 65, mwa moke. Ezali mpenza elengi mingi, lolenge ya kopumbwa yango ezali te. Ezali mpenza elengi mingi, lolenge ya kotika yango ezali te. Mwa molunge ezali, kasi tókóba kaka.

¹³¹ Yisaya 65, bóyoka eloko oyo ekosalema na ntango yango. Mpe mítuna naino yo moko, moninga mosumuki, soki o—soki okoki kondima kozanga yango. Yisaya 65, tóbanda pene na molongo ya 17. Bóyoka, bino nyonso, na bokébi sikawa. Ekosalema na eleko ya Millennium, ntango esika eleki Bulee ekopakolama.

Mpamba te, tala, nazali kokela lola ya sika mpe. . . mabelé ya sika, mpe makambo na liboso makokanisama te, makoya mpe na makanisi te.

Kasi bó. . . sepela mpe boyoka esengo. . . ata na yango ezali ngai kokela, mpamba te, tala, nakokela Yelusaleme. . . nakokela Yelusaleme, (ezali Yelusaleme ya Sika), mpo na kosepela, mpe bato na ye mpo na esengo.

Epakweli ezali nini? Esengo ya Nkolo.

. . . kokela Yelusaleme mpo na esengo, mpe bato na ye mpo na esengo. Nakosepela kati na Yelusaleme, . . .

Mokonzi kati na Ngbende, na Ngbende ya bokonzi monene, Ngbende ya Seko, mpe bato ya Seko, ná esengo ya Seko na kati ya Engumba ya Seko! Oh, la la!

Nakosepela kati na Yelusaleme, mpe nakoyoka esengo kati na bato na ngai, mongongo na kolela ekoyokama lisusu na kati na yango te, to konganga na mpasi te.

Kati na yango, ekozala lisusu te. . . mwana oyo akobika bobele mwa mikolo, to mobange oyo akokisi mikolo na ye te, mpamba te mwana akokufa nsima na mibu mokama; kasi mosumuki, oyo azali na mibu mokama, akolakelama mabe.

Bakotonga ndako, mpe bakofanda na yango; . . . bakolóna bilanga na vinyo, mpe bakolia mbuma na yango.

Bakotonga te ete mosusu áfanda; (elingi koloba, okufi bongo mwana na yo azua esika na yo) . . . bakotonga te ete mosusu áfanda; bakolóna te ete mosusu ália mbuma na yango, mpamba te lokola mikolo na nzete, bongo ekozala mikolo na bato na ngai, mpe baponami na ngai bakosepela kino ntango molai mpo na misala na maboko na bango.

Bakosala mosala na mpamba te, bakobota mpo na mpasi te; mpamba te bakozala bakitani na bapámبولami na Yawe, mpe bana na bango elongo na bango.

Ekosalema ete . . . naino babiangi te, nakozongisela bango monoko; . . . (Epakweli ya nkembo wana, nsima na Kelúba!) . . . nakozongisela bango monoko; mpe naino bazali koloba mpenza, nakoyoka.

Mbwa ya zámhá mpe mwana na mpate bakolia elongo moko, . . . nkosi akolia matiti lokola ngombe, mputulú ekozala bilei na nyoka. Mpe bakoyokisa mpasi te, mpe bakobebisa te na ngomba mobimba na bulee na ngai, Yawe alobi bongo. (Bokoki kozanga yango? Te!)

¹³² Bózonga naino lisusu awa, Yisaya moto azali koloba lisusu, na mokapo ya 11, molongo ya 1 kino 9. Bóyoka oyo alobi lisusu awa, ntango amonaki emononeli, nsima na ye komona basi, bizaleli na bango na ntango ya nsuka. Ni- . . . Malamu, Yisaya 11, na 1.

Nzete ekotoa na ntina na Yisai . . . mpe etápe ekobima na misisa na ye: (Ezalaki nani? Klisto.) . . . na misisa na ye,

Molimo na Yawe akofanda likolo na ye, molimo ya bwanya, ya lisosoli, molimo ya toli . . . ya nguya, molimo ya boyebi mpe . . . botosi kotosa Yawe;

Akosepelisa ye na botosi kotosa Yawe, akosambisa te kobila oyo emonani na miso na ye, akokata te kobila . . . oyo eyokani na matoi na ye:

Kasi na boyengebene akosambisa babola mpe na sembo akolobela basókemi kati na mokili mpo na lisumu na nko na bango, akobeta mokili na lingenda na monoko na ye, mpe na mpema na bibebu na ye akoboma oyo mabe.

Boyengebene ekozala nkámba na loketo na ye, mpe kondimana nkámba na mipiko na ye.

Mpe nyama na yauli akofanda elongo na mwana mpate, mpe nkosi akolala elongo na mwana ntaba (ezali ntaba); mwana ngombe mpe nkosi mpe nyama na mafuta . . . to mwana ngombe, to nkosi mpe nyama na mafuta elongo; mpe mwana moke akokamba bango.

. . . ngombe mpe ngombolo bakolia elongo; . . . bana na bango (mpe) bakolala esika moko, nkosi akolia matiti lokola ngombe.

Mwana na libéle akosakana na libulu na etúpa, mpe mwana atiki mabéle akotia loboko na ye na esika na nyoka.

Bakoyokisa mpasi te, bakobébisana mpe te na ngomba mobimba na bulee na ngai: jambi mokili ekotonda na boyébi . . . lokola mai ezipaka mai na mbu.

Hum! Ekosalema na Yelusaleme ya Sika wana. Oyo “ya sika” wana. *Etápe*, awa, oyo balobeli, ezali *Etápe* ya Dawidi. “Azali na mbala moko *Etápe* mpe Mokitani.”

¹³³ Sikawa, nsima na yango, Mwasi na libala amonani. Nsima na mpóso ntuku nsambo, Mwasi na libala amonani na Emoniseli mokapo ya 19, molongo ya 1 mpe ya 16. Ayei elongo ná Mobali na libala na Ye, Mokonzi na nguya. Oh, la la! Nayebi te soki tokomóna yango nyonso to te. Tokómi wana, boye . . .

Boye, tótanga kaka eteni na yango, ata bongo. Awa nde epai Mwasi na libala akoya, nsima na oyo. Bomoni? Nsima na Millennium kobanda, nde Klisto akozonga elongo ná Mwasi na libala. Ya solo, 1 kino 16, mpe mokapo ya 19.

Na nsima na makambo oyo . . .

Nsima na Monyóko; nsima na Mawa; nsima na Bilembo; nsima na Malózi; nsima na Satana kobwakama; nsima na Millennium kobanda. Bótala malamú!

. . . nsima na makambo oyo nayokaki . . . mongongo lokola mongongo na ebale monene na bato kati na likolo koloba ete, Aleluya; Lobiko, mpe nkembo, . . . lokumu, . . . nguya, na Nkolo Nzambe na biso,

Mpo ete bikateli na yo bizali solo mpe sembo, mpo ete akweisi mwasi na pité yango monene, oyo abebisaki mokili na pité na ye, asi abukanisi ye mpo na makila na baombo na ye.

Mbala na mibale ye . . . bango . . . Mbala na mibale balobi ete, Aleluya. Molinga na mboka yango ekobutaka libela na libela.

Oyo wana ezali lingomba mwasi ya ndumba ya kala, “mólinga na ye emataki.”

Bampaka yango ntuku mibale na minei, na bizali-na-bomoi yango minei bakwei, mpe basambeli Nzambe oyo afandi likoló na ngbende, koloba ete, Amen; Aleluya.

Mpe mongongo ebimi na ngbende ete, Bósanzola Nzambe na biso—Bósanzola Nzambe na biso, bino baombo na ye nyonso, ná bino baoyo bobangaka ye, bato mike ná bato minene.

Nayokaki mongongo lokola mongongo na ebele monene, . . .

Bóyoka! Tokómi wana, Lingomba. Nsima na Ye komata na mokapo ya 3, Ye oyo ayei. Bomoni? Sikawa molongo ya 6.

Nayokaki mongongo lokola mongongo na ebele monene, lokola mongongo na mai monene, lokola mongongo na nkake makasi, koloba ete, Aleluya, mpo ete Nkolo Nzambe na biso, mozui-na-nguya-nyonso, asili kozala mokonzi.

Aleluya! Bótala! Libala ya Mwana-mpate ezali koya sikawa. Ye oyo Azali koya.

Tósepela, tózala na esengo, tókumisa ye, mpo ete libala na Mwana-mpate esili koya, mwasi na ye asili komibongisa nzoto. (Ye oyo Azali koya, bango mibale, Mwasi-na-libala ná Mobali-na-libala.)

Nzela epesami na ye ete álata bilamba petepete, na lángilángi, na peto, mpo ete bilamba yango petepete ezali . . . boyengebene na basantu.

Alobaki na ngai ete, Komá ete, Esengo na bango basili kobengama na elambo na libala na Mwana-mpate. Mpe ye alobaki na ngai mpe ete, Maloba oyo . . . ezali maloba na Nzambe na solo.

Nakweaki na nsé na makolo na ye kosambela ye. Alobi na ngai ete, Kosala bongo te, Nazali moombo moninga na yo, . . . bandeko na yo, mpe bazali na . . . bandeko na yo mpe bazali na matatoli na Yesu, sámbela Nzambe, mpo ete litatoli (ya Klisto) na Yesu ezali molimo ya lisakoli.

Namonaki likolo efungwami, mpe . . . mpunda ya pembe; . . . (oh, la la!) . . . mpe ye oyo afandi na yango . . . abengami Sembo ná Solo, mpe . . . asambisaka mpe ye abundaka etumba na boyengebene.

Mpe miso na ye ezalaki lokola epeleli na móto, mpe . . . motó na ye ezalaki mitóle na bokonzi mingi; . . .

Balatisaki Ye motóle ya nini? “Mokonzi na bakonzi.”

. . . mpe azalaki na nkombo moko esili kokomama, oyo moto mosusu ayebaki te, bobele . . . ye moko.

Alati elamba ya mpembe esili koyinama na makila, mpe nkombo na ye ebiangami ete, Liloba na Nzambe.

“Na ebandeli Liloba ezalaki, mpe Liloba ezalaki Nzambe. Mpe Liloba ekómaki nzoto mpe afandaki elongo na biso.” Ezalaki Nani? Yesu.

. . . mpe nkombo na ye ebiangami ete, Liloba na Nzambe.

Bibele na babundi na likolo bazali kobíla ye, bafandi na ba-mpunda ya mpembe, balati bilamba petepete, mpembe, peto. (Nkembo! Tala Ye mwasi koya.)

Na monoko na ye ezali na mopanga na kopela, oyo . . . mpe ete na ntina ete abola libota nyonso, mpe . . . ye akokéngela bango na fimbo na ebende, ye akonyata ekámelo na vinyo na kongala na nkanda na Nzambe Mozui-na-nguya-nyonso.

Na elamba na ye mpe na ebelo na ye azali na nkombo ekomami ete, MOKONZI NA MOKONZI MPE NKOLO NA NKOLO.

¹³⁴ Ezalaki nini? Bato na Ye bautaki kolatisa Ye motóle ya Mokonzi na mokonzi mpe Nkolo na bankolo. Azalaki kozonga na Tempelo mosantu na Ye, oyo epakolamaki na Bozali ya Nzambe, mpo na kobika mpe kokonza na Millennium elongo ná Lingomba na Ye. Amen! Komonana, elongo ná Mokonzi na nguya, mpo na kozua esika na Ye na mopanzi na Ye mobali, Tempelo ya sika ya bokonzi oyo epakolami.

¹³⁵ Sikawa ntina motoba ya Emoniseli 6:1 kino na Emoniseli 19:21 ekokisami.

¹³⁶ Bóyoka sikawa, mpo na kosilisa. Bilembo Nsambo, Kelelo Nsambo, Mbeki Nsambo, Malózi Misato, mwasi na kati ya mói, kobwakama ya zabolo, to ya dalagóna motane, ezali katikati na ba-ntango oyo, na eleko ya Monyóko monene. Bóbosana yango te. Makambo nyonso oyo ezali kosalema na ntango oyo.

Kasi oyo nde ntina motoba ya Boyei na Ye. Bondimi yango? Ntango ya nkembo nini oyo ezali kozela baoyo balingaka Nkolo! Nayebisi yo, moninga, tokoki komeka kozanga yango te. Bózanga yango te, ata mpo na likambo nini oyo osalaka. Yéba yango malamú mpenza!

¹³⁷ Sikawa, mokolo ya Lomongo, soki Nkolo alingi, Nazali na mposa ya kotalisa, soki Akosunga ngai, kolakisa mpenza esika nini moko na moko ya mikolo nsambo yango, esika nini esalemaki, Kotalisa likambo moko—moko oyo nauti kosala lelo, kotia eleko nsambo yango, mpóso nsambo, mpóso ntuku nsambo, na esika ya bulee mpenza ya Bayuda, mpe kotalisa mpenza esika nini tozali kobika awa na nsuka, soki Nkolo alingi.

¹³⁸ Bolingaka Ye? [Losambo balobi: “Amen.”—Mok.] Bokoki komeka kozanga Lola? [“Te.”] Tozali na ntango ya nsuka!

Azali koya kosala nini? Likambo ya liboso oyo ekosalema, liboso Yesu áya na mabelé, likambo ya liboso ekozala nini? Lingomba eko (nini?) nétolama! Yesu akoya na mabelé mpe akokende kotambola na mayíta, mpo na kopesa mbote ya loboko na tata ná mama, kosolola na biso nyonso awa, mpe komata, boye te? Te!

Ekosalema ndenge nini? E . . . Tozoloba likambo oyo na bino, na nzela—na nzela na Liloba na Nkolo: “Ete biso baoyo tozali na bomoi mpe totikali . . .” Batesaloniki ya Mibale, mokapo ya 5: “Biso baoyo tozali na bomoi ná baoyo totikali mpo na Boyei ya Nkolo, tokopekisa te to tokokende liboso na baoyo balali te. Mpamba te kelelo ya Nzambe ekoyula; bakufi kati na Klisto bakosekwa liboso: mpe biso baoyo tozali na bomoi mpe totikali, tokonétolama elongo ná bango mpo na kokutana na Nkolo na mipepe.” Tokonétolama mbala moko, na kobweta liso. Na ntango yango nde Eleko ya Lingoma ekosila.

¹³⁹ Na nsima, awa na mabelé, Nzambe akobanda kosala ná Bayuda. Ekozala basakoli mibale. Mokapo ya 11, tokosimba yango. Basakoli mibale oyo bapakólami, lokola Eliya ná Mose, oyo nakanisi ete ezali bango. Bakopesa bilakeli mabe ya minene, nsima na bango komona ete bakangani makasi, mpe Roma esili kobuka boyokani na yango, mokonzi wana.

Na katikati ya mpóso ya ntuku nsambo, ekobuka boyokani na yango na Roma, to Roma nde ekobuka yango na Yisraele, mpe ekosala ete libébi ébanda kopalangana. Bongo mpela monene ekosalema, ntango litiká ya Mabota, báseka oyo balali . . . Dalagóna, Roma, abwakaki mai uta na monoko na ye, mpo na kobundisa litiká ya momboto na mwasi, oyo azali kotosa mibeko ya Nzambe. Loma nde akosala yango.

¹⁴⁰ Lisanga ya mangomba ekosangisa bango elongo, mpe ekokotisa Bayuda na lisanga yango, mpe ekozongisa bango na losambo na kati ya tempelo na bango moko lisusu, kokokana na YANGO ELOBI NKOLO ya Biblia, mpe bakozala na lingomba na bango moko.

¹⁴¹ Bakómi nini sikawa? Nauti kosimba yango kaka sikawa. Ezali ya sika. Bakómi sikawa ekólo, bandimami. Boye te? Kasi bazui naino losambo na bango na tempelo te. Ntango bakobanda kosambela na tempelo, Lingomba ekosila kokende. Nzambe akozala kosala ná Bayuda lokola ekólo. Bongo, ntango bakokóta na lisangana oyo, Roma akobuka yango na katikati ya mobu ya ntuku nsambo, mibu misato na ndambo, akobuka boyokani yango ná bango, mpe ekosala ete mbindo oyo epesaka libebi épalangana kino na nsuka. Na bongo, akozua ná ba-Protestant, ná Bayuda, mpe akonyokola bango. Na ntango wana, basakoli mibale oyo bakotelema mpe bakolakela mokili mabe, ete mbula ekobeta te na mikolo ya lisakoli na bango. Mpe bakobenga móto kouta na likolo, mpe makambo ya ndenge na ndenge. Bózela kaka. Tozali na makambo mingi awa, oyo ezali kozila biso, mpo na koyekola.

¹⁴² Oh, Nzambe monene nini oyo Ye azali! Azali mpenza Tata na mawa! Banninga, bótika ete náloba yango, lokola mobateli na bino. Bozoyéba te matómbá nini oyo bozali kobika na nsé na yango. Boyebaka yango te. Bato minene mingi, basantu mingi,

nkóto na nkóto na bato ya bulee oyo bakúfá na mibu eleká, bato batóndisamá na Molimo, baoyo balingaki komona mokolo oyo bozali kobika kati na yango. Tika ete yo ná ngai tózua litómba na yango.

¹⁴³ Eloko mosusu nini tokotalela? Tokoki kosala eloko nini nsima na oyo? Tozali kokende wapi? Eloko nini ekosalema? Tosengeli kokende esika moko. Okoki kotikala awa ntango nyonso te. Okoki kokáta matiti na yo; na mpóso ekolanda, esengeli lisusu kokatama; iyo, mbala mibale, liboso na ntango yango. Okoki kobokola bana na yo. Opesi bango bilei ya mói; na ntango ya bilei ya mpokwa, bayoki lisusu nzala. Opesi bango bilei ya mpokwa; bayoki lisusu nzala na ntango elandi. Osombeli bango sapato; soki bazali lokola baoyo ya ngai, pene na sánzá mibale to misato, osombeli bango mosusu. Osombeli bango bilamba na sánzá oyo; sánzá moko to mibale, osombeli bango bilamba ya sika. Bomoni? Eloko moko te ekóbaka. Eloko moko te ezangi kobóngwana. Eloko moko te ekoki kotelema ngwi.

Kolula bozui ya mpamba ya mokili oyo te,
Oyo ebebaka mbangu-mbangu,
Tongá bilikia na yo likólo na biloko ya Seko,
Yango ekoleka soki moke te!

Ntango etondi na mbongwana ya mbangu-
mbangu,
Eloko moko te, na mokili, ekoki kozanga
kobongwana,
Tongá bilikia na yo likólo na biloko ya Seko,
Simba loboko ya Nzambe oyo ebongwanaka te!
Simba loboko ya Nzambe oyo ebongwanaka te!
Simbá loboko ya Nzambe oyo ebongwanaka te!
Tongá elikia na yo likólo na biloko ya Seko,
Simba loboko ya Nzambe oyo ebongwanaka te!

Bóyoka:

Ntango mobembo na biso ekosila, (Akoyebisa
biso ntango ekosila.)
Soko tozalaki sembo epai ya Nzambe,
Ndako na biso ya kitoko mpe ya bongengi na
Nkembo, (Engumba oyo epakolami.)
Elimo na biso oyo enétolami ekomona yango!
Simba loboko ya Nzambe oyo ebongwanaka te!
Simba loboko ya Nzambe oyo ebongwanaka te!
Tongá bilikia na yo likólo na biloko ya Seko,
Simba loboko ya Nzambe oyo ebongwanaka te!
Kolula bozui ya mpamba ya mokili oyo te,
Oyo ebebaka mbangu-mbangu,
Tongá kaka bilikia na yo likolo na biloko ya
Seko,
Yango ekoleka soki moke te!

Simba loboko ya Nzambe oyo ebongwanaka te!
 Simba loboko ya Nzambe oyo ebongwanaka te!
 Tongá bilikia na yo likólo na biloko ya Seko,
 Simba loboko ya Nzambe oyo ebongwanaka te!

Wana togumbi mitó na biso, soki osímbá naino loboko na Ye te, okoki koya kosala yango sikawa te?

Simba loboko ya Nzambe oyo ebongwanaka te!
 Tongá bilikia na yo likólo na biloko ya Seko,
 Simba loboko ya Nzambe oyo ebongwanaka te!

¹⁴⁴ Mwana-mwasi, ozali mwana-mwasi kitoko sikawa. Mwa nsuki na yo ezali kitoko, mwa matama na yo ezali mwa motáné. Kasi, oyebi, ekozala bongo kino lobi kaka, nsima na yango, ekolimwa. Tokoyeba ndenge nini soki na mpóso ezali koya, nkusú ekolia te, na mabelé, mwa matama kitoko wana, ya mwa motane?

¹⁴⁵ Elenge mobali, ozali makasi, molai, na misuni makasi; ozali na mposa ya minene. Kasi nsima na ntango moke, kaka lobi, nsuki kitoko wana, milelomilelo, ekobanda kokwea, mpe oyo ekotikala ekokóma mpembe. Mapeka minene wana, oyo etéléamá, ekogúmbama, mpe nkusú ekolia maboko mpe misuni. Bakomema yo, bakotia yo na nse ya mputulu.

Boye, tongá bilikia na yo likolo na biloko ya Seko,
 Yango ekoleka soki moke te!
 Simba loboko ya Nzambe oyo ebongwanaka te!
 Simba loboko ya Nzambe. . .

Nalingi ete ótombola loboko mpe ósimba loboko na Ye sikawa.

Tongá bilikia na yo likólo na biloko ya Seko,
 Simba loboko ya Nzambe oyo ebongwanaka te!
 Nsima, ntango mobembo oyo ekosila, (Ekosila, mokolo moko.)
 Soko ozalaki sembo epai ya Nzambe,
 Ndako na yo kitoko mpe ya bongengi na Nkembo,
 Elimo na yo enétolami ekomona yango!
 Mpo na nini te kosímba loboko ya Nzambe oyo ebongwanaka te!
 Simba loboko ya Nzambe oyo ebongwanaka te!
 Tongá bilikia na yo likólo na biloko ya Seko,
 Simba loboko ya Nzambe oyo ebongwanaka te!

¹⁴⁶ Namóná makambo mingi, ekokisi mibu pene na ntuku misato na moko oyo nazali nsima na eteyelo. Namóná makambo ya mawa; namóná makambo ya nkembo. Likambo ya mawa koleka, oyo namoná na bomoi na ngai. . . Namóná bana mingi kokufa nzala na balabala; namóná bamama kosenga-senga mpo

na kozua eteni ya lipa. Likambo ya mawa koleka, oyo namóná, ezali, moto mpenza, oyo asengelaki kozala mwana ya Nzambe, ákufa kozanga koyeba Nzambe.

¹⁴⁷ Nazokanisa mwasi moko oyo atelemaki na ekuke ya losambo oyo, na mpokwa moko, asekaki ngai. Alobaki: “Nakotika te ete ngombe na ngai ézala na eyamba lokola oyo ya ye!” Ngonga moko ekokaki te, babengisaki ngai na lopitalo. Mwasi kitoko, ya mibu pene na ntuku mibale na mibale, azalaki koganga: “Bóbenga motei wana awa!” Azalaki mo-Katoliko, na kondima na ye.

Ntango nakómaki wana, mobange ndeko mwasi alobaki: “Okómi nsima na ntango, Ndeko Branham. Akufi eleki pene na minúti mitano.”

Nalobaki: “Nakoki komona ye?”

Alobaki: “Abélelaki yo, na maloba na ye ya nsuka, ete: ‘Bóbenga motei wana, Ndeko Branham!’”

Mobali na ye azalaki wana, azalaki kogánga: “Bóndela mpo na ye! Sálá libóndeli!”

Nalobaki: “Ntango esili mpenza koleka, sikawa.”

¹⁴⁸ Nabendaki ezipelo. Azalaki na miso minene ya mwa motane. Mwasi kitoko; mwa matónó na elongi na ye; nsuki ya mwa motane; kitoko mpenza. Anyokwamaki mingi kino matónó ebimaki na elongi na ye lokola matónó ya makilá. Miso na ye ebimaki mpenza libanda na bisika na yango, bongo. Mpe, na bosolo, misopó ná mimpíko na ye esalaki mosala makasi, ezalaka na kati ya—na kati ya . . . Ekómelaka bato mingi, ntango babundaka na liwa. Azalaki wana, atandamaki na lolenge wana, monoko polele. Mpe mpóso na ye ya miso ekangáki kaka ndambo ya liso. Nakobosana yango soki moke te. Loyembo yango eyelaki ngai na makanisi.

Kolula bozui ya mpamba ya mokili oyo te.
(Kitoko, biyenga.)

¹⁴⁹ Natelemaki pembeni na moto moko awa na Port Fulton, azalaki kobunda na liwa. Babengaki ngai pembeni na mbeto na ye. Mpe nabóndéláká elongo ná ye awa, na etumbelo, mokolo moko na mpokwa. Atiaki loboko zinga-zinga na mwasi moko. Nalobaki: “Longóla loboko na yo zinga-zinga na mwasi wana.”

Alobaki: “Nazali kokamba ye epai ya Nzambe.”

¹⁵⁰ Nalobaki: “Ná loboko na yo zinga-zinga na ye te.” Nandimaka makambo ya ndenge wana te. Asilikelaki ngai. Abimaki mpe abetaki ekuke.

Nakendeki kokutana na ye, nsima na mwa ntango, azalaki kobunda na liwa. Atalaki ngai na elongi, alobaki: “Kobóndela mpo na ngai te, Ndeko Bill. Nasili kobunga. Esili mpo na ngai.” Alobaki: “Nyonso oyo natikálá kozua, esili kokenge na yango.”

¹⁵¹ Nazalaki awa na litúmu, na mwa eteni ya ndako, mokolo moko, epai ya moto oyo abengaki ngai pembeni na mbeto na ye, azalaki kobunda na liwa. Alobaki: “Nazalaká ntango nyonso na mposa ya eloko *boye na boye*, mpe boye.” Alobaki: “Kasi natikálá kosálela Nkolo ata moke te. Mbala mingi, nazalaki komipekisa kokende na etumbelo.” Alobaki: “Ndeko Branham, bóndela ete Nzambe ásala ete mwana na ngai ya mwasi ábongisa makambo oyo ngai nasálá. Ntango mosusu akoki kosala likambo moko mpo na Nkolo.”

¹⁵² Nalobaki: “Ekoki kosalema te, ndeko. Makambo oyo okokaki kosala, esili kobunga.” Hum!

¹⁵³ Natelemaki pembeni na moto moko, namonaki ye kobunda na milimo mabe ngonga ntuku mibale na minei. Alobaki ete milimo mabe ezalaki pembeni na mbeto na ye, ná minyolólo zinga-zinga na kingo na bango. Alobaki: “Bótika te ete bákanga ngai!” Kogángá; bazalaki kosimba ye mpo átikala na mbeto. Alobaki: “Ye wana ateleme. Bozali komona yango te? Ezali koya kozua ngai.” Abóyáki Nzambe, ntango molai koleka. Azalaki na ba-ndako minene ya bibwele, etóndá na matiti, etóndá na blé, ba-mpunda kitoko ya bopoti-mpangu. Mobu moko liboso na yango, alakéláki Nzambe mabe liboso na Ye, abétáki mwasi na ye mbata mpo akendeke na tabernacle. Boyebi eloko nini esálemaki? Nkake ebetaki ndako ya bibwele na ye, mpe ebomaki ba-mpunda na ye, ezikisaki matiti na ye nyonso. Mpe mobali yango akufaki na kati ya elakeli mabe moko boye, kobundáká ná milimo mabe bátika ye.

¹⁵⁴ Mpe mobange moninga na ngai moko (nkembo!) azali ngambo kuna, akómaki na nsuka ya nzela. Nalobaki: “Tata, ozali kokende?”

Alobaki: “Ezali bongo, Billy.”

Nalobaki: “Ezali ndenge nini?”

¹⁵⁵ Alobaki: “Nyonso ezali malamú.” Alobaki: “Bénga bana na ngai pembeni na mbeto.” Atiaki mwa maboko na ye ya kolemba likolo na bana na ye moko na moko mpe apambolaki bango. Ayebisaki bana na ye mibali mibale, alobaki: “Bósimba maboko na ngai, bótombola yango likoló, lokola Yosua ná Kalebe basalaki.” Tozalaki komituna eloko nini alingaki koloba. Alobaki:

Mokolo ya esengo, mokolo ya esengo,
 Uta Yesu asukólá masumu na ngai!
 Alakisaki ngai lolenge ya kokéngela mpe
 kobondela,
 Mpe kobika na esengo mikolo nyonso.

Tosengeli kokóma na makambo mosusu wana, baninga! Moto nyonso alingaka kolia bilei ya malamú, kokumba motuka ya kitoko, kozala na biloko ya malamú koleka, oyo tokoki

kozala na yango. Nazali kopamela ye te. Ezali mabe te. Nzambe alingaka ete bózala na yango, kasi:

Kolula bozui ya mpamba ya mokili oyo te,
Oyo ebebaka mbangu-mbangu,
Tongá bilikia na yo likólo na biloko ya Seko,
Yango ekoleka soki moke te!

Tótombola maboko sikawa, wana tozali koyemba.

Simba loboko ya Nzambe oyo ebongwanaka te!
Simba loboko ya Nzambe oyo ebongwanaka te!
Tongá bilikia na yo likólo na biloko ya Seko,
Simba loboko ya Nzambe oyo ebongwanaka te!

¹⁵⁶ Wana totelemi, tóbaluka mpe tópesana mbote ya loboko sikawa. Tokokóba na liyangani na mwa ngonga moke. Kasi nalingi ete bóbaluka, wana tozali koyemba eteni mosusu ya loyembo yango.

Simba loboko ya Nzambe oyo ebongwanaka te!

Sálá yango, tata! Sala yango, tata! Epai ya Nzambe! Sálá yango, elenge! Sálá yango, ndeko mobali! Sálá yango, ndeko mobali!

Tongá bilikia na yo likólo na biloko ya Seko,
Simba loboko ya Nzambe oyo ebongwanaka te!

¹⁵⁷ Bozali na esengo mpo na Ye, boye te? Bóloba “Amen!” [Losambo balobi: “Amen!”—Mok.] Moto nyonso oyo alingaka Ye, loba: “Nkembo na Nkolo.” [“Nkembo na Nkolo!”] Baoyo nyonso bandimi ete bazali kokende na Mboka oyo ya matumu minei, bótómbola loboko. (Bózela, mwa moke, na loyembo na bino.)

Nazali kokende na Engumba kitoko wana,
(Bayembaka yango ndenge nini sikawa?)
Oyo Nkolo abongiseli baoyo na Ye;
Esika basíkolami nyonso ya bileko nyonso
Bakoyemba “Nkembo!” zinga-zinga na
Ngbende ya Mpembe;
Mbala mosusu nayokaka mposa makasi ya
Lola,
Mpe ya nkembo oyo nakotala:
Ekozala esengo mpenza, Ntango nakomona
Mobikisi na ngai,
Na Engumba kitoko wana ya wólo.

Bosepelaka na yango, boye te?

Nazali kokende na Engumba kitoko wana,
Oyo Nkolo abongiseli baoyo na Ye moko;

Esika basíkolami nyonso ya bileko nyonso
 Bakoyemba “Nkembo” zinga-zinga na
 Ngbende ya Mpembe;
 Mbala mosusu nayokaka mposa makasi ya
 Lola,
 Ná bisengo oyo nakomona:
 Ekozala esengo mpenza, Ntango nakomona
 Mobikisi na ngai
 Na Engumba kitoko wana ya wólo.

Bolingi Ye? [Losambo balobi: “Amen.”—Mok.] Na bongo:

Mema Nkombo na Yesu elongo na yo,
 Mwana na mawa mpe na bolozi;
 Ekopesa yo esengo mpe libondisi,
 Mema Yango bisika nyonso okokende.

Nkombo ya lokumu (Nkombo ya lokumu!),
 O ezali mpenza kitoko! (O ezali mpenza
 kitoko!)

Elikia ya nsé mpe esengo ya Lola;

Nkombo ya lokumu, (Nkombo ya lokumu!), O
 ya kitoko!

Elikia ya nsé mpe esengo ya Lola.

Sikawa, bóbosana te, mokolo ya Lomingo na ntongo, na
 ngonga ya libwa na ndambo. Na bongo, tokomeka, soki Nkolo
 alingi, kosilisa na ntango, mpo na kobondela mpo na babeli,
 mokolo ya Lomingo ekoya na ntongo, na ngonga ya libwa na
 ndambo.

Tokogumbamela Nkombo na Yesu,
 Tokofukama na makolo na Ye,
 Tokolatisa Ye motóle ya Mokonzi na bakonzi na
 Lola,
 Ntango mobembo na biso ekosila.

Nkombo ya lokumu (Nkombo ya lokumu!),
 Ezali mpenza kitoko! (Ezali mpenza kitoko!)

Elikia ya mokili mpe esengo ya Lola;


Nkombo ya lokumu (Nkombo ya lokumu!),
 Ezali mpenza kitoko!

Elikia ya mabelé mpe esengo ya Lola.

Bóyoka naino eteni oyo:

Tokogumbamela Nkombo na Yesu,
 Lokola nguba liboso na motambo nyonso;
 Wana masénginya ezingi yo,
 Loba bobele Nkombo mosantu wana na
 libondeli. (Ekoki na yango!)

Nkombo ya lokumu, (Nkombo ya lokumu!),
Ezali mpenza kitoko! (Ezali mpenza kitoko!)
Elikia ya mabelé mpe esengo ya Lola;
Nkombo ya lokumu, (Nkombo ya lokumu),
Ezali mpenza kitoko!
Elikia ya nsé mpe esengo ya Lola.

Sikawa nazongisi losambo epai ya mobateli, Ndeko Neville,
mpo ásilisa na mwa maloba mpe nyonso oyo akoki koloba. 

NTINA MOTOBA YA BOYEI YA GABRIELE EPAI NA DANYELE LIN61-0730E

(The Sixfold Purpose Of Gabriel's Visit To Daniel)

MATEYA NA NTINA NA MPÓSO NTUKU NSAMBO YA DANYELE

Liteya ya Ndeko William Marrion Branham oyo, eteyamaki liboso na Anglais mokolo mwa Lomingo na mpokwa, 30, sanza ya Nsambo, 1961, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org